

مسرحية

الوصية

تأليف

محمد الصواف

مؤسسة يسطرون للطباعة والنشر والتوزيع



رئيس مجلس الإدارة

عماد سالم

المدير العام

أحمد فؤاد الهادي

مدير الإنتاج

أحمد عبد الحليم

الطبعة الأولى

الكتاب : الوصيّة

المؤلف : محمد الصواف

تصنيف الكتاب : مسرح

تصميم الغلاف : أحمد علي

إخراج عام : أحمد عبد الحليم

المقاس ١٤ × ٢٠

رقم الإيداع : ٢٥١٢٩ / ٢٠١٧

الترقيم الدولي : 0 - 548 - 776 - 977 - 978

العنوان : المكتبة والمطبعة : ٣ ش صفوت - محطة المطبعة شارع الملك فيصل - الجيزة

التليفون : ٠١٢٢٩٣٠٠٠٢٩ - ٠١١٥٧٧٦٠٠٥٢

Email : yastoron@gmail.com

موقعنا على الفيس بوك : مؤسسة يسطرون لطباعة وتوزيع الكتب

جميع الحقوق محفوظة للمؤلف

إهداء

إلى كل الشرفاء الذين مازالوا قابضين على قيمهم ومبادئهم
فى زمن يفرض فيه "كلب العالم" أنظمتة فى محاولات
مستميتة لقتل الإنسانية.

محمد الصوائف

الوصية

هذا نص يدعوك للقراءة

الكاتب الكبير

عبد الغني داود

محمد الصواف كاتب مسرحي أجاد حرفة الكتابة للمسرح، متمرسٌ في لغة خشبة المسرح ، وكم ساهم في بناء عروض للمحترفين والهواة وعروض للمسرح العمالي مع المخرج فهمي الخولي والمخرج فيصل عزب والمخرج هشام جمعة والمخرج صفوت حجازي .

وساعده على صقل هذه الإمكانية الكتابة لورشة المخرج عوني كرومي لنص الألماني ماكس فريش "مشعلو الحرائق" في الهناجر التي سافرت بهذه التجربة إلى ألمانيا ، وكذا موهبته الكبيرة في عالم شعر العامية وعرضه " لحظة حب " كمثال على ذلك في مسرح السلام ، وتشهد نصوصه التي

نشرها مثل " حكاية ملك طربقها" و"العملية ٠٠٧" و"شيلوك ياهو" على
تمكنه من أسرار الدراما، والمزج ما بين الشعر والدراما في براعة .

والنص الذى بين أيدينا "الوصية" تبدو فيه بساطة التناول فى الحبكة
والحوار ولغة الشخصوس التى تبدو فى خفة الظل والرشاقة - رغم تعدد
الشخوص التى ترحم المشهد - لكن الحوار يتدفق فى انسيابية رغم تشابك
وتعدد الأحداث فى إيقاع متسارع ونشط.

وها هو النص بين يديك رغم إدراكى بتعدد القراءات، فلا وصاية
لأحد على القارئ، كما أن لا وصاية لأحد - أيا كان - على المؤلف
المبدع.

عبر الغنى وادو

الشخصيات

زعلوك	: مربى الكلب
نانى	: أرملة هلباوى ابو العز
نصحي	: مدير اعمال هلباوى ابو العز
حمزاوى	: محامى هلباوى ابو العز
رمانه	: خادمة
منسى	: خادم
شملول	: شقيق هلباوى ابو العز
ابناء شملول	: عكشة ، مداح ، ترمة
شملولة	: شقيقة هلباوى ابو العز

ضبش : زوج شملولة

ابناء شملولة مغاوري ، فتنة ، سهاد

العمدة : شيخ الغفر ، غفر (من أربعة الى ستة أفراد) ، الشيخ فتاوى
واتباعه

الأهالى : شمباوى المجذوب ، همام الحداد، رزه خطيبة همام ، ام

رزة بائعة خضار، حفلط الحلاق، كستبان الترزى، دقدق

النجار، شغته الجزار، مروان، ربيع، فتيحة ، مرزوق،

عنطوظ، سعدان، زلطة، زقليطة، جابر، مرعى، سعدية،

بدرية

مشهد ١

القصر

(الكل حاضر للعزاء في وفاة الملياردير هلباوى أبو العز.
زوجته نانى هانم والأخ شملول وأولاده مداح وعكشة
وترمسة. والأخت شملولة وأولادها سهاد وفتنة ومغاورى
وزوجها ضبش. تتظاهر الوجوه بالحزن. يمر منسى بصينية
القهوة، وتمر رمانة بصينية الماء ولكن لا أحد يمد يده)

شملول : الله يرحمك يا اخويا سيبت فراغ كبير فى العيلة (يتصنع
البكاء)

مداح : ماتعملش فى نفسك كده يا بابا

عكشة : احنا عارفين انك كنت بتجبه وهو كمان كانت روحه فيك

شملول : يا حبيبى يا اخويا اهى اهى (يتصنع البكاء)

ترمسة : يا بابا كده حتموت نفسك .. ده انت ماكتتش بتزوره وهو

عايش!

- عكشة** : وانتى ايش عرفك .. ده عمى الغالى
- شملول** : اخويا يا اولاد.. هو فيه زى الاخ؟!
- شملولة** : يا الى اتخطفت بدرى يا اخويا .. يا حنين يا هلباوى
- ضبش** : وبعدين يا شملولة .. ده انتى من امبارح مابطلتيش عياط
- شملولة** : سيبنى يا ضبش .. ده انا لو عيطت ميت سنة مش كفاية
- سهاد** : عندك حق يا ماما.. بصراحة ماكانش فيه زى خالو الهلباوى
- ابو العز.. عيطى يا ماما
- مغاورى** : ماما.. بما انك اصبحتى من اصحاب الثروات.. ممكن تفكى الكيس وتدينى اشبرق نفسى
- شملولة** : اتلهى يا مغاورى
- فتنة** : بصراحة يا ماما واحد غنى جدا زى خالوا.. يستاهل ان كلنا نحزن عليه اكر من اى حد تانى (تشير لعمها)
- شملولة** : هو انا كان لي حد غيره
- شملول** : قصدك ايه يا شملولة؟! هو انا مش اخوكى ولا ايه؟!
- شملولة** : ماقصديش يا شملول.. وسيبنى بقى فى الى انا فيه
- نانى** : مش كده يا جماعة.. ده انتوا اخوات .. امال انا اعمل ايه الى
- اترملت فى عز شبابى.. يا حبيبى يا هلباوى باشا .. ياريتنى
- كنت مت قبلك

شملولة

: ربنا يكون فى عونك يا حبيبتي

شملول

: شدى حيلك يا نانى هانم.. الحقيقة اخويا المرحوم كان

بيعزك قوى

نانى

: وانا كمان كنت باتمنى له الرضا يرضى.. مش عارفه اعمل ايه

من بعده.. الله يرحمه

الجميع

: الله يرحمه

(يدخل زعلوك ومعه الكلب يحدث هرج ومرج)

زعلوك

: الله يرحمك يا هلباوى باشا ويبشيش الطوبة الى تحت راسك

مغاورى

: كلب! ايه الارف ده

فتنه

: يا مامى

شملول

: انت ايه الى دخلك بالزفت ده؟

زعلوك

: ماهو انا بتاع الزفت.. قصدى بتاع الكلب.. ماينفesh ارواح

فى حته من غيره.. وماينفesh اسبيه لو حده

شملولة

: ليه يعنى؟! ده حته كلب لا راح ولا جه!

زعلوك

: لا يا شملولة هانم.. الكلب ده كان غالى قوى على هلباوى

باشا

شملول

: ايه التخاريف الى بتقولها دى يا ولد يا زعلوك!

زعلوك

: انا مش عايز اقولك بقى يا شملول بيه.. انه كان اقرب حد

ليه

- شملول** : سامعه بيقول إيه يا نانى هانم ؟!
- نانى** : ولد يا بتاع الكلب
- زعلوك** : تحت امرك يا نانى هانم
- نانى** : خللى بالك .. الى كان ساندك انت والكلب بتاعك
وسايبكوا تبرطعوا فى القصر .. الله يرحمه
- الجميع** : الله يرحمه
- نانى** : يعنى غلطة تانية مش حيحصلك كويس
- زعلوك** : يا هانم انا باقول الحقيقة وحضرتك عارفة كويس .. ده
ماكانش المرحوم بيحس بالأمان وهو نايم غير والكلب فى
حضنه
- نانى** : بره .. اخرج بره يا حيوان
- زعلوك** : يا هانم
- (الجميع يحاولون اخراج زعلوك وتهدة نانى)
- مغاورى** : خلاص بقى يا ولد
- مداح** : اسمع الكلام
- عكشة** : اطلع بره

(يخرج زعلوك والكلب)

شملول : اكيد يا نانى هانم عندك علم بكل تفاصيل تركة اخويا الله
يرحمه؟

الجميع : الله يرحمه

نانى : الى عنده التفاصيل مدير اعماله الأستاذ نصحى

ضبش : عموما الميت فدان الى فى زمام الكفر.. انا متأكد انه كاتبهم
لشملولة

شملول : هو كان بيطبق سيرتها

شملولة : لا كان بيحبك انت !

ضبش : انا ما اسمحلکش يا استاذ شملول توجه اهانه لمراتى

شملولة : (تنهره بحدة) ضبش

ضبش : حاضر

شملولة : احنا مش جايين نتخانق .. احنا جايين نشوف حقنا فين

عكشة : انتوا مستعجلين ليه؟ الاستاذ نصحى على وصول وحنعرف

منه كل حاجة

(تدخل رمانة الخادمة)

رمانة : الاستاذ نصحى

- نانى** : خليه يدخل
(يدخل نصحى)
- نصحى** : البقية فى حياتكم جميعا
- الجميع** : شكرا
- شملول** : المرحوم سايب ايه؟
- طبش** : كتب لكل واحد نصيبه؟
- شملولة** : ولا حنقسم التركة حسب الشرع؟
- نصحى** : على مهلكم واحدة واحدة .. انا كل الى اعرفه ان هلباوى
باشا الله يرحمه
- الجميع** : الله يرحمه
- نصحى** : سايب وصية
- عكشه** : فيها إيه الوصية دى؟
- ترمسه** : وصية لمين؟
- مغاورى** : اكيد لنا كلنا!
- فتنه** : وليه ماتقولش سايب لكل واحد على قد ما كان بيحبة!
- مداح** : فين الوصية؟
- شملول** : أيوه.. طلع الوصية

- نصحي** : للأسف انا ما عنديش علم باللى مكتوب فى الوصية.. لكن الى عنده الوصية وعارف مكتوب فيها إيه.. الأستاذ حمزاوى المحامى
- شملولة** : وهو فين الاستاذ حمزاوى؟
- نصحي** : موجود .. (مناديا) يا استاذ حمزاوى
- حمزاوى** : (يدخل) البقاء لله
- الجميع** : شكرا
- شملول** : فين الوصية؟
- شملولة** : اقرا لنا الوصية
- عكشه** : طلعتها
- حمزاوى** : الحقيقة يا جماعة هلباوى باشا الله يرحمه
- الجميع** : الله يرحمه
- حمزاوى** : قبل ما يكتب الوصية دى.. حاولت اقنعه بالعدول عنها.. ولكنه اصر إصرار شديد.. واوصانى بعدم فتحها الا بعد وفاته
- شملول** : عايزين نعرف إيه الى فى الوصية ؟
- حمزاوى** : حالا .. بس ارجوكم تمالكوا اعصابكم

- ضبش** : ما تخلصنا بقى تعبت اعصابنا
- شملولة** : (تنهره بحدة) ضبش
- ضبش** : حاضر
- حمزاوى** : (يخرج الوصية ويقرأها) اوصى انا هلباوى ابو العز.. وانا فى كامل قواى العقلية.. بأن تؤول جميع ممتلكاتى من عزب واطيان ومصانع وقصور وأموال.. لرامب.. على أن يقوم بالصاية عليه السيد زعلوك
- شملول** : ايه؟! زعلوك!
- شملولة** : ومين رامب ده؟!
- حمزاوى** : الكلب
- الجميع** : الكلب؟!

إظلام

مشهد ٢

السوق

(بعض المباني الفقيرة حيث نجد محلات كل من حفظ
الحلاق دقدق النجار كستبان التري همام الحداد وشغته
الجزار إلى جانب أم رزة التي تجلس لتبيع الخضار في مشنة
وضعت على الأرض. مجموعة من الأهالي يتواجدون
بالسوق ومن بينهم شمباوى المجذوب)

شمباوى : (رجل مجذوب يعتبره البعض مجنوناً بينما يراه البعض حكيماً.
يرتدى ملابس مهلهلة وغريبة ويمسك بعصا بها شراشيب
ملونه) هلباوى ابو العز.. ماكانش بيعز.. غير الكلب ابو
ديل يهز يهز يهز

عنطوظ : (بعظمة) معقولة يا اخونا؟! .. الهلباوى باشا يكتب كل
الثروة دى للكلب؟! لا لا لا مالوش حق ابداً

فتيحة : (ساخرا) ومالك متعنظ قوى كده ياسى عنطوظ.. زى
مايكون الهلباوى باشا كان صاحبك

- عنطوظ** : وفيها إيه يا فتيحة.. طب ده انا جدى المعجبانى باشا كان
عنده فلوس اكر من الهلباوى باشا
- فتيحة** : امال راحت فين؟
- عنطوظ** : كان مبذر حبتين
- فتيحة** : مبذر! ولا مالقاش كلب يكتبهاله
- مرزوق** : والله الهلباوى باشا فعلا مالوش حق.. طب كان ادهالنا.. ده
انا عندى كوم عيال
- فتيحة** : ماهو انت لو كنت مخلف كلاب كان نابك م الحب نايب؟!
والله حاجة تجن يا اولاد
- عنطوظ** : يا اخونا ده ماله وهو حر فيه.. يديه لى هو عايزه .. لكن
مش للكلب!
- فتيحة** : مزعلك قوى الكلب.. ومش مزعلك الفقر الى احنا فيه؟!
- مرزوق** : ارزاق.. واكيد الكلب ده طيب وعشان كده ربنا فتحها عليه
- فتيحة** : ارزاق إيه انت عقلك طق يا مرزوق.. دى ثروة.. فاهم
يعنى إيه ثروة؟!
- مرزوق** : ايوه فاهم.. يعنى فلوس كتير
- فتيحة** : قول فلوس بالكوم.. بس هل ده يجوز؟!
- مرزوق** : اسأل الشيخ فتاوى

- فتيحة** : قول لى يا شيخ فتاوى
- فتاوى** : عايز إيه يا فتيحة؟!
- فتيحة** : الثروة الى الهلباوى باشا سابها للكلب.. تبقى رزقه صحيح؟!
- فتاوى** : وَمَا مِنْ دَائِيَةٍ فِي الْأَرْضِ إِلَّا عَلَى اللَّهِ رِزْقُهَا وَيَعْلَمُ مُسْتَقَرَّهَا وَمُسْتَوْدَعَهَا كُلٌّ فِي كِتَابٍ مُبِينٍ
- فتيحة** : لا اله الا الله
- سعدان** : (مسطول) يا عم ده ملك.. وبعدين انتوا واجعين دماغكوا ليه.. اداها للكلب مادهاش للكلب واحنا مالنا.. طيرتوا الحجرين من دماغى
- مرزوق** : الهى تطير دماغك اكتر ما هى طاييره يا سعدان يا ابن روايح.. ماتبطل يا ولا الزفت الى بتشربه ده
- سعدان** : بفلوسى
- مرزوق** : لا وانت الصادق بفلوس امك روايح بتاعة المخروطة
- شمباوى** : الكلب بقى اغنى من البنى آدمين
- بدرية** : (فى ميوعة) باقولك إيه يا ام رزه.. هو الكلب يا اختى مش ناوى يتأهل؟ (تضحك بخلاعة)
- ام رزه** : انتى بتقولى فيها .. بكره النسوان تجرى وراه وورا فلوسه

- بدريّة** : مش عارفه ليه اليومين دول بقيت احب الكلاب قوى!
- ام رزه** : اليومين دول بس!!
- بدريّة** : قصدك إيه يعنى يا ام يارزة؟!
- ام رزه** : قصدى ان طول عمرك شاطره.. عارفه تحبى إيه وما تحبش إيه.. مش زى الخايبة بنتى
- بدريّة** : بنتك بتحب همام.. امال هم حيتجوزوا امتى؟
- ام رزه** : ابقى اسألها
- دقدق** : باقول إيه يا اسطى حفلط
- حفظ** : قول يا اسطى دقدق
- دقدق** : هو كلب الهلباوى ده.. كلب عادى يعنى زى بقيت الكلاب؟!
- حفظ** : لا.. كلب عادى ايه؟ اسألنى انا بقى عنه .. ده انا اعرفه معرفه شخصية
- دقدق** : يا راجل!!
- حفظ** : امال .. والله من ساعة ما جابولى الكلب ده عشان اساوى له شعره.. وانا قولت عليه ابن عز
- دقدق** : يا نهارك اسود يا حفلط .. يعنى انت كنت بتحلقل بالمقص الى بتحلقل بيه للكلب؟!

- حفظ :** وانت تطول.. ده بقى الكلب باشا
- دقدق :** باشا إيه وزفت إيه الله يخرب بيتك
- حفظ :** اهدى بس ما تتحمقش قوى .. انا ماحلقتلكش يا اسطى
- دقدق بالعدة الى حلقتله بيها
- دقدق :** باحسب
- حفظ :** هم جابولى عدة جديدة مخصوص للكلب
- دقدق :** اشمعنى!
- حفظ :** اصلهم خافوا عليه ليتعدى من البنى آدمين .. مش باقولك
- ابن عز
- شغته :** طبعاً ابن عز .. ده ماكانوش بياخدوله غير احسن حته
- لحمه.. ولا انتوا كنتوا فاكرينه زى كلاب الشوارع.. الى
- بيعملوا فرح لو شافوا حته عظمة
- زلطة :** كلاب شوارع إيه يا معلم شغته.. اذا كنا احنا نفسنا مش
- لاقيين العظم
- زقليطة :** يا راجل ماتقولش كده.. لأ .. لقيينه.. بس عند الجزار
- (لشغته) ماتجيب حبة عظم يا معلم اعمل عليهم شوربة
- شغته :** امشى يا واد انت وهو بلا تلقيح جتت .. كل حاجة بالفوس
- زقليطة :** وهى فين الفلوس؟

- شغته : الفلوس عند الصراف
- زقليطة : والصراف عايز بيضة
- زلطة : والبيضة عند الفرخة
- عنطوظ : والفرخة عايزه قمحة
- مرزوق : والقمحة عند التاجر
- فتيحة : والتاجر عايز فلوس
- شغته : والفلوس عند الصراف
- سعدان : (وهو يترنح) برضه ما عرفتش الفلوس فين (يعيدون الدوره مرة أخرى)
- سعدية : انتى شوفتيه يا ام رزه؟
- ام رزه : مش فاكرة يا سعدية .. ما الكلاب كثير
- سعدية : يقولوا ان الهلباوى بيه كان جايبه من بلاد بره
- ام رزه : والله يا بنتى ما بيعجيش من الغرب حاجة تسر القلب
- سعدية : ده يقولوا انه بيهو هو بالانجليزى
- ام رزه : ولسه يا ما حيقولوا .. مش بقى معاه فلوس
- سعدية : ما تيجى معايا نروح نشوفوا
- ام رزه : اروح فين واسيب اكل عيشى .. روحى انتى يا سعدية ..
- حكم انا عارفكى .. عايزه تعرفى كل حاجة

- سعدية** : طب ما اخدرزة معايا
- ام رزه** : مالكيش دعوه برزه
- كستبان** : تعرفوا ان انا الى مفصل له آخر بدلة .. اكيد لما يشوفنى حيعرفنى
- دقدق** : طبعا حيعرفك .. ما انتوا شبه بعض (الجميع يضحك) ومش بعيد يطلع اخوك فى الرضاعة (الجميع يضحك)
- كستبان** : احترم نفسك يا دقدق .. يا نجار على ما تفرج
- دقدق** : وجب يا معلم كستبان .. يا ترزى الكلاب
- شمبراوى** : الهلباوى مالقاش اوفى من الكلب .. عشان كده .. هلباوى ابو العز ماكانش بيعز غير الكلب ابو ديل بيهز يهز يهز
- همام** : انا لو اعرف انه حيكتب ثروته للكلب .. والله ماكنت عملت السلسله الى طلبوها منى عشانه
- حفاظ** : وفيها ايه يا اسطى همام .. عملت حاجة وخدت تمنها .. وكله أكل عيش
- همام** : اكل عيش لى زيك .. لكن انا لأ
- كستبان** : (بهمس) طول عمرك فقرى يا ابن الحداد
- همام** : بتبرطم تقول ايه يا كستبان؟

كستبان : باقول يعنى مش كل ماتقرالك كلمتين فى الجرنان تترسم
بيهم علينا

حفظ : ياريت تيجى على الجرنان.. ده بيقرا كتب كمان

مروان : وده يزعلكوا فى إيه؟ .. ما تعملوا زيه.. على الاقل تعرفوا
الدنيا فيها إيه

همام : سيبك منهم يا مروان.. دول مش فالحين غير فى الكلام
وبس

حفظ : ليه.. هو انا مش باخد منك الجرنان بعد ما تقراه

دقدق : بتاخده عشان تمسح المرايات

جابر : يظهر اننا بقينا فى آخر الزمن يا اولاد.. اهلباوى ده اكيد اتجن
فى آخر ايامه

مرعى : ولا اتجن ولا حاجة .. ماهو فى بلاد بره الكلاب لها قيمة

جابر : يا سلام!! وانت ايش دراك؟

مرعى : الدش .. امال يا وله.. ده فى بلاد بره فيه جمعيات اسمها

جمعيات حقوق الحيوان

جابر : طب وحقوق الانسان؟!

مرعى : الانسان الى هنا ولا الى فى بلاد بره؟!!

ربيع : وهى جت على حكاية الكلب .. ما الى بيعمله العمدة اسخم

من الى عمله الهلباوى

مروان : وليه ما تقولش انها اشاعة .. مطلعها العمدة ورجالته عشان

يلهى الناس عن مصيبة ناوى يعملها

همام : ماتستبعدهاش عليهم .. لكن برضه مافيش دخان من غير

نار

مروان : يا خبر النهارده بفلوس بكره يبقى ببلاش

زقليطة : بس انا برضه مش مصدق الحكاية دى يا زلطة

زلطة : ولا انا مصدقها يا زقليطة .. الهلباوى يكتب الفلوس

للكلب .. ولسه ياما نشوف يا بلد

همام : يعنى ايه يا اخوانا .. يعنى انتوا راضيين عن الى حصل ده؟!

بعض : (مروان وربيع وجابر ومرعى) لا طبعاً

الاهالى

كستبان : واحنا مالنا

همام : مالنا ازاي؟! .. يعنى راجل زى الهلباوى ده .. عاش طول

عمره يعمل ثروته من الهبش والاستغلال ودم الغلابة ..

ومافكرش يعمل خير مره واحدة فى حياته .. ولما يموت

يكتب ثروته للكلب .. ده ياما خرب بيوت ناس .. الله

يجحمه مطرح ما راح .. عاش كلب ومات كلب

شمباوى : ايوه ايوه يا همام يا حبيبى .. فيه ناس تعيش كلاب.. وناس تموت كلاب.. وناس زى الكلاب بتجرى ورا العز .. هلباوى ابو العز ماكانش بيعز غير الكلب ابو ديل بيهز يهز

همام : يظهر انك العاقل الى فينا يا شمباوى.. ويقولوا عليك مجنون آل

شمباوى : كلب الباشا بقى باشا.. وبقى غرقان فى العز.. هلباوى ابو العز.. ماكانش بيعز.. غير الكلب ابو ديل بيهز يهز يهز (تدخل رزه)

رزه : هو فيه إيه يا امه .. والكفر ماله مقلوب كده؟

ام رزه : همام خطيبك.. عمال يجعجع.. عاملى فيها سبع البورمبة .. وفى الآخر ييجوا الغفر ياخدوه على دوار العمدة .. هو ما بيعرמש!

رزه : يا لهوى (تجرى على همام) فيه إيه يا همام؟

همام : يعنى حيكون فيه إيه يا رزه .. حاجة تفور الدم

رزه : يا حبيبى اهدى .. وسبيك بقى من اللى بتعمله ده

همام : كلام إيه ده يا رزه !!

رزه : بصراحة انا زهقت من نقرزة امي كل شوية .. انتوا

حتتجوزوا امتي؟! .. انتوا حتتجوزوا امتي؟! .. هو شاف

مطرح ولا لسه؟! .. وانا مش عارفه ارد عليها اقولها ايه؟!

همام : قوليلها ان انا باشتغل ليل نهار.. وكل ما اجمع قرشين عشان

اجيب حاجة.. الاقى سعرها زاد

رزه : ما انت برضه يا همام بتضيّع فلوس كتير على شرا الكتب..

انا مش عارفه لزمته ايه؟!

همام : لزمته ايه؟! لا يا رزه ماتقوليش كده.. القراية هي حياتي..

انا كان نفسى اكمل تعليمي.. بس لما والدى تعب..

اضطريت اسيب الدراسة واقف في الورشة مكانه.. عشان

اصرف على البيت

رزه : عارفه.. بس نفسى يبقى معاك فلوس كتير.. عشان نقدر

نحقق اللى بنحلم بيه

همام : ازاي بس؟!

رزه : فرجه قريب

همام : في زمن الكلاب اللى بقى معاها فلوس ما افتكرش

رزه : معلش يا حبيبي.. اصبر.. ان شاء الله ربنا حيفرجه

همام : وبعد ما يفرجها؟

رزه : نتجوز
 همام : وبعد ما نتجوز؟
 رزه : الله .. ماتكسفنيش بقى
 همام : بحبك وانتى مكسوفه
 رزه : وانا بحبك قوى يا همام .. ومافيش قوة فى الدنيا حتقدر
 تبعدننى عنك
 همام : توعدينى
 رزه : اوعدك .. مافيش فى الدنيا قوة عنى حتبعذك
 شمباوى : الحب مكتوب ووعد.. ومين يغير المكتوب .. ومين يقدر
 يصون الوعد ويقدر يعدل المقلوب.. (بسخرية مقلداً رزه)
 بحبك يا همام

إظلام

مشهد ۳

القصر

(منسى ورمانة وزعلوك حيث نجد زعلوك فى حالة

هستيرية يصرخ)

زعلوك : يا نهار اسود .. يا ليلة طين

منسى : فيه إيه يا زعلوك؟!

رمانة : مالك عمال تولول كده .. ده بدل ما تفرح!

زعلوك : افرح ازاي؟! .. دى مصيبة وحطت على دماغى .. اعمل إيه

بالفلوس دى؟! .. ده انا لو اكّلت كلاب الكفر كلها

فلوس .. عمر الفلوس دى ما حتخلص

منسى : والله امرك عجيب!!

رمانة : صحيح مش وش نعمه

زعلوك : الله يخرب بيتك يا هلباوى باشا .. ده انا ماباعرفش افك

الخط

رمانة

: ما هو انت لو كنت بتفك الخط.. ما كنتش بقيت بتاع الكلب.. وكان زمانك موظف محترم مرمى فى أى مصلحة مش لاقى تاكل

منسى

: والله عندك حق يا رمانة

رمانة

: جتها نيلة الى عايزة خلف .. واحد مكانك كده.. كان زمانه فرحان ومظطط .. ويدور على بنت الحلال الى تدلعه

زعلوك

: وهى فين بنت الحلال دى؟

رمانة

: ماهى قدامك اهه.. ولا اتعميت .. انت مش كنت عايز تتجوزنى؟!

زعلوك

: ما انا ياما جريت وراكى واتحايلت عليكى.. وانتى الى ماكتيش راضية

رمانة

: كنت عبيطة وهبله.. وادينى عقلت.. وماحصلش حاجة.. احنا لسه فيها (تقطع له تفاحه بالسكينة وتعطيها له) خد يا زعلوك

(يسمع صوت نانى)

ص نانى

: يعنى إيه .. أنا حاتجن

زعلوك

: يلا بسرعة قبل ماتيجى (تضع رمانة السكينة والتفاحة)

رمانه : انت خايف منها يا زعلوك؟! .. المفروض هي دلوقت الى
تخاف منك

زعلوك : دى ست عصبيه ولسانها طويل .. خليكوا انتوا .. انا خارج
(يخرج زعلوك ووراء منسى ورمانه بينما تدخل نانى
ونصحى وحمزاوى)

نانى : كل الثروة دى للكلب! .. طب وانا! .. انا الى ضحيت
بنفسى ودفنت شبابى .. واتجوزته وانا اصغر منه باربعين
سنة؟! ..

حمزاوى : لا .. هم عشرين سنه بس يا نانى هانم

نانى : وانت حتعرف اكر منى

نصحى : لا لا .. مالکش حق يا استاذ حمزاوى .. دى نانى هانم ..
والله .. انا ما اديها ازيد من عشرين سنة .. دى لسه ورده
بتفتح

نانى : (فى دلع) ميرسى يا نصحى

حمزاوى : يا نانى هانم اذا كتنى مستدعيانى عشان نتكلم فى حل
للمشكلة .. يبقى نتكلم بموضوعية شوية .. وماتنسش انك
اتجوزتى الهلباوى باشا عشان فلوسه .. لا عشان جماله ولا
عشان بتحبيه

نانی : طبعاً اتجوزته عشان فلوسه.. امال حتجوزه عشان إيه
 يعنى.. الله يحجمه مطرح ما راح .. من أول ما اتجوزته وانا
 مستتية موته عشان اورثه .. واتحملت أرفه وبخله وعياه..
 وفى الآخر.. يموت.. وآل إيه ما اورثوش.. واطلع من مولد
 بلا حمص .. ويكتب ثروته كلها للكلب.. ده على جتتى
 (تشره سكينة تقطيع التفاح فى وجه حمزاوى) فاهم

حمزاوى : فاهم فاهم .. (مشيرا للسكينة) بس ابعدى دى
نصحى : لكن إيه اللى يخليه يعمل كده؟! .. ده كان بيحبك جدا
 (يهمس لها) بس مش اقدر منى طبعاً.. انا باموت فيكى

نانى : كل الرجالة خاينين
حمزاوى : مش يمكن حس باللى كان بينك وبين الأستاذ نصحى؟!
نانى : اخرس.. ده انا اشرف من الشرف .. نصحى إيه ده اللى

ابص له
نصحى : اخرسى

نانى : (تنهره فى حده وتحذير) نصحى
نصحى : (لحمزاوى) اخرس

حمزاوى : انا ماجيتش حاجة من عندى.. ده الكلام اللى كان متنتور
 فى القصر.. وأكيد هو نفسه كان عارف .. بس يمكن خاف
 م الفضيحة

نصحي : استاذ حمزاوى .. انت ليه عمّال تلت وتعجن فى الكلام زى الستات

نانى : (تنهره فى حده) نصحي

نصحي : عمّال تلت وتعجن فى الكلام زى الرجالة .. ركز فى المصيبة الى احنا فيها

نانى : ايوه.. ركز فى المصيبة الى احنا فيها.. وشوف طريقة آخذ بيها ثروة جوزى.. فاهم.. ثروة جوزى

نصحي : قصدك ناخذ (وهو يشير لنفسه ولنانى)

حمزاوى : قصدكم ناخذ (يشير لنفسه ولنصحي ولنانى)

نانى : ماعنديش مانع.. بس خلصونى

حمزاوى : على بركة الله .. انا حاتصرف .. بس ارجوكم تتعاملوا مع زعلوك بطريقة كويسة

نانى : طريقة كويسة ازاى يعنى؟! .. ده خدام

حمزاوى : لا .. مابقاش خدام.. ده الوصى على الكلب وثروة الكلب.. ومن هنا ورايح المعاملة تتغير خالص.. لحد ماناخذ الى احنا عايزينه

نانى : (متغصبة) حاضر

نصحي : طبعا طبعا

- حمزاوى** : (منادياً) منسى
- منسى** : (يدخل منسى) نعم يا سعادة البيه
- حمزاوى** : شوف زعلوك بيه وخليه يشرفنا
- منسى** : زعلوك بيه؟! زعلوك الى شغال معانا لمؤاخذه.. زعلوك بتاع الكلب!؟
- حمزاوى** : ايوه.. خلاص.. من النهارده بقى زعلوك بيه
- منسى** : والله وروحت يا زعلوك بين الملوك
- نانى** : (بعصبية) بتبرطم تقول ايه؟ .. يلا روح اندهله بسرعة
- منسى** : حاضر يا ست هانم (يخرج)
- حمزاوى** : اهدى يا نانى هانم .. وزى مافهمتك
- نانى** : ماتخافش عليا.. ده انا نانى
- (يدخل زعلوك)
- زعلوك** : أيوه يا ست هانم
- نانى** : زوزو .. تعالى يا زعلوكتى
- زعلوك** : زوزو!! زعلوكتى!! .. ده انا يا ست هانم!؟
- نانى** : هانم إيه بقى .. انت خلاص بقيت واحد مننا .. هانم دى دمها ثقيل .. قول لى يا نانى
- زعلوك** : لكن..

نانى : مالكنش

نصحى : زعلوك بيه فخر لينا كلنا

حمزاوى : الحقيقة يا زعلوك باشا .. اهلباوى باشا كان ذو نظرة ثاقبة ..

وكان محققاً فى اختيارك الوصى على ثروة الكلب رامب

زعلوك : هو فيه إيه؟! .. ومالكم كده بقيتوا طيبين قوى .. ربنا يستر

حمزاوى : يا زعلوك بيه أنت مثال الأمانة

نصحى : مانة

ونانى

حمزاوى : والشرف

نصحى : شرف

ونانى

حمزاوى : والوفاء

نصحى : فاء

ونانى

حمزاوى : والإنسانية

نصحى : نية

ونانى

حمزاوى : والإخلاص

نصحى : لاص (مشيرين بمعنى خلصنا بقى)

ونانى

زعلوك : انا مش فاهم أى حاجة من الكلام اللى بتقولوه .. كلمونى

على قد فهمى يا ناس

- نصحي** : طيب .. فكرت حتعمل إيه بالثروة الكبيرة اللى انت وصى عليها؟
- زعلوك** : ما هى دى المصيبة .. دى حمل وامانة .. يا خيبتك الثقيلة يا زعلوك
- نانى** : هو ده كان عشمى فيك .. ونعم الامانه
- نصحي** : اصيل يا زعلوك
- حمزاوى** : طبعا فيه ناس غلابة كتير
- زعلوك** : قوى
- نانى** : يرضيك كل الفلوس دى تبقى عند الكلب والناس مش لاقيه تاكل؟
- زعلوك** : لا مايرضينيش
- حمزاوى** : الناس مش لاقيه مدارس فى الكفر عشان تتعلم .. ولا مستشفيات فى الكفر عشان تتعالج .. يرضيك؟
- زعلوك** : لا مايرضينيش
- نصحي** : شوارع الكفر مكسرة ومافيش صرف صحى
- زعلوك** : ايه الصرف الصحى ده؟
- نانى** : يعنى مافيهاش مجارى .. ولا مش عارفها؟!
- زعلوك** : لا عارفها

- حمزاوى** : والترعة مافيش عليها كورنيش الناس تتمشى عليه ساعة
العصارى
- زعلوك** : يعنى إيه كورنيش؟
- نانى** : رصيف يعنى بس ليه سور صغير
- زعلوك** : ايوه عارفه
- نانى** : يرضيك؟
- زعلوك** : لا مايرضينيش
- حمزاوى** : انا كنت عارف انه مش حيرضيك
- نانى** : وانا كمان يا زعلوكتى.. كنت عارفه قلبك الطيب الحنين
- نصحى** : انا بقى كنت متأكد
- زعلوك** : انا بقى مش فاهم حاجة.. يعنى انتوا عايزنى أعمل إيه؟
- حمزاوى** : انت مش حتعمل حاجة خالص
- نانى** : (وهى تملس على شعره) احنا الى حنعمل كل حاجة
- نصحى** : احنا بس حنقدملك ميزانيات بالخير الى حنعمله مع الناس
.. والمشاريع الى حنعملها لخدمة الناس.. وانت تمضى
- زعلوك** : امضى ازاي.. أنا ما باعرفش اكتب اسمى.. أنا بابصم
- نصحى** : ينفع يبصم يا استاذ حمزاوى؟
- حمزاوى** : وان ماكانش ينفع.. نخليه ينفع عشان خاطر زعلوك باشا

- زعلوك** : ربنا يقدر ك على فعل الخير .. بس فيه سؤال يعنى .. الفلوس دى تعتبر فلوس الكلب .. لما نصر ف الفلوس على الى انتوا بتقولوا عليه .. الكلب يعنى حىستفد ايه؟
- حمزاوى** : احنا حنقول للناس .. ان الكلب هو الى قايل لنا نعمل كده
- زعلوك** : وهو الكلب بيتكلم؟
- نانى** : يا اخى افهم بقى .. احنا حنقول ان الكلب بيتكلم .. وانك انت الى بتفهم كلامه وتبلغنا .. عشان الناس تحبه وتدعيه .. والخير الى بنعمله يبقى ليه .. ويقعد له فى ميزان حسناته
- حمزاوى** : وبعدين يا زعلوك اهم شئ الخير الى حنعمله .. ولا تبقى فلوسه ومايستفيدتش منها؟!
- زعلوك** : لا .. ده انا عايزه يستفيد قوى .. دى أمانه
- نصحي** : خلاص
- زعلوك** : بس تفتكروا الكلب حىبقى مبسوط؟
- نانى** : طبعا .. إلا مبسوط .. ده مايفش كلب معاه فلوس قبله عملها
- زعلوك** : عندك حق
- نصحي** : طمنا عليه .. هو عامل إيه ؟ .. وليه ماجاش معاك؟

زعلوك : ده من ساعة ما عرف انه بقى غنى.. وهو متعنظ.. وسابق

التناكة ولا كأنه الهلباوى باشا

نانى : طول عمرها الكلاب بتعمل كده يا زعلوك

زعلوك : لا.. قوليلى يا زعلوكتى

نانى : بس كده.. يا زعلوكتى.. يا زوزو النوزو كمان نوزى

(منادية) يا منسى

منسى : (يدخل) ايوه يا ست هانم

نانى : جهز لزعلوك بيه الأوضة اللى جنب اوضتى

منسى : امرك يا ست هانم

نصحى : (فى غضب وغيره واضحة) لا.. ده كتير قوى

نانى : (تذهب إليه) بتقول حاجة يا نصحى؟

نصحى : ما خلاص.. الى احنا عايزينة وصلنا له.. وحنعمل المشاريع

عشان نقدر ناخذ الثروة.. والميزانية لعبتى.. لزمته إيه بقى

تبقى أوضته جنب أوضتك.. المفروض تراعى شعورى يا

نانى

نانى : أولاً.. اسمى نانى هانم

نصحى : نانى هانم!

نانى : ثانياً.. الى بينا شغل وبس

- نصحي** : إيه!! شغل وبس؟! :
- نانى** : لو مش فاهم .. اندهلك الخدامين يفهموك :
- نصحي** : للدرجة دى؟! :
- نانى** : يخرب بيت جمالك يازعلوكتى .. وايه السحر الى فى عينيك ده :
- زعلوك** : ماهى دى عينيه من زمان.. ولا اكون عشان غسلت وشى اتغيرت :
- نانى** : من دلوقت كل حاجة فيك اتغيرت :
- زعلوك** : ربنا يستر :
- ص رمانه** : استنوا لما ادى الهانم خبر (تدخل شملولة وزوجها وأولادها وشملول وأولاده) :
- شملولة** : هانم مين!.. ده مال اخونا :
- شملول** : أيوه مال اخونا :
- نانى** : فيه إيه؟! ومالكم داخلين كده من غير استئذان؟! :
- شملولة** : مالنا ! لأ مالنا ومال اخونا :
- شملول** : (يهجم على زعلوك) بقى انت يا زعلوك الكلب تبقى وصى على ثروة اخويا!! :
- زعلوك** : وانا مالى.. هو انا يعنى الى وصيت نفسى :

- حمزاوی** : (حمزاوی يحول بين شملول وزعلوك) اهدى يا شملول بيه
- ضبش** : (يتحفز للمشاجرة ويهجم على زعلوك) يا واخذ قوتى يا
- ناوى على موتى
- شملولة** : (فى حدة) ضبش
- ضبش** : حاضر
- نانى** : (تصرخ) اتصل بالعمدة وشيخ الغفر يا استاذ حمزاوى..
- دول جايين يتهجموا علينا.. عايزين يقتلونا
- حمزاوى** : اهدوا يا اخونا واسمعونى
- عكشة** : ماتهدا يا بابا.. واهدى يا عمتى.. وخلونا نسمع الأستاذ
- حمزاوى
- حمزاوى** : برافوا عليك يا عكشة .. تعالى جنبى هنا (ينضم عكشة لحمزاوى) .. دلوقت يا جماعة الى حصل ده قانونى فيه الميه
- ترمسه** : بس لا يجوز الوصية بأكثر من تلت التركة
- حمزاوى** : برافوا عليكى يا ترمسة.. بس الى انتوا مش عارفينه.. ان العمدة موقع شاهد على الوصية.. وتوقيع العمدة فوق كل القوانين.. وده بند جديد تم اضافته لقوانين الكفر من اسبوع
- ترمسة** : لوده حصل.. يبقى موقفنا ضعيف

- همزاوی** : تعالی جنبی یا ترمسة (موجهاً حديثه للجميع) لكن احنا
نقدر نتصرف.. وانتوا برضوا تستفيدوا
- شملول** : ايدنا على كتفك .. بس قول لنا ازای؟!
- همزاوی** : تعالی جنبی یا شاملول بيه
- شملولة** : واضح ان الحكاية بتتطبخ
- مغاوری** : اصبری یا ماما.. اكيد حينوبنا من الحب جانب.. اجی
جنبك یا استاذ همزاوی؟
- همزاوی** : قول لامك الأول
- شملولة** : (لمغاوری) لا ماترو حش
- همزاوی** : احنا حنعمل خير كثير.. ومشاريع مهمه بناء على تعليقات
الكلب
- فتنه** : هو الكلب بيتكلم؟!
- همزاوی** : ما هو اللى لازم تعرفوه.. ان الهلباوی باشا كان عنده حق فى
كل اللى عمله .. لان اتضح ان الكلب ده مش كلب عادى..
ده بيتكلم ويرقص ويغنى ومش بعيد يألف كتب ..
والوحيد اللى بيفهم لغته.. زعلوك
- شملولة** : لا .. ده كلام فاضى
- ضبش** : دى تخاريف

حمزاوی : خلونا فی المهم.. الی موافق یشغل معانا فی مشاريع الخير
یرفع إیده

مغاوری : فيه مقابل ولا مافیش؟

حمزاوی : طبعا فيه مقابل.. ومقابل كبير قوى قوى (ینظر لشملول
وأبنائه) طبعا انتوا معايا

عكشة : معاك

حمزاوی : (لشملوله ومجموعتها) وانتوا؟!!

شملوله : احنا عايزين حقنا.. الميت فدان الی فی زمام الکفر.. وإلا
مش حنسکت

حمزاوی : كده انتوا بتحطوا العربية قدام الحمار .. یعنی مش معانا
(یشیر لمداح وهو يحدث شملول) الواد ده مش تبعکوا

عكشة : ایوه.. تعالى یا مداح (ینضم مداح لشملول واخوته)

حمزاوی : على بركة الله

اظلام

مشهد

السوق

(شملول ومداح وعكشة وترمسة ونصحى وحمزاوى
يقومون بتوزيع النقود والأقمشة والملابس على الأهالى بينما
تقف نانى تراقب ردود أفعال الأهالى وبجوارها زعلوك وقد
تغيرت حالته)

عكشة : (يعطى رزمة نقود لمرزوق) خد يا مرزوق الكلب باعت لك
المبلغ ده

مرزوق : لازم عارف ان انا صاحب عيال.. ربنا يستره ويزيده من
نعيمه

مداح : (لعنطوظ) خد يا عنطوظ الفلوس دى من الكلب

عنطوظ : كلب!! لا لا.. انا ما اخدش فلوس من الكلب

مداح : ماتتعنطظش قوى كده وانت مش لاقى تاكل

عنطوظ : لا.. ده انا اتعنطظ ونص.. آل كلب آل!

نصحى : خد يا فتيحة وادعى للكلب

فتيحه : الله!! وهو الكلب بيتكلم!!

- عكشة** : (يأخذ منه النقود) لأ ما بيتكلمش
- فتيحة** : (يقوم بخطف النقود من يده) ده انا باضحك معاك .. ده بيتكلم سبع لغات
- نصحى** : طب ادعى له
- فتيحة** : ربنا يكثر فلوسه
- شملول** : (لسعدان) خد يا سعدان شبرق نفسك الكلب بيصبح عليك
- سعدان** : اجدع صباح لاجدع كلب .. عليا النعمة الكلب ده صاحب مزاج على قوى
- نصحى** : خد يا ربيع حاجة بسيطة من الكلب
- ربيع** : وهو الكلب يدينا بتاع إيه؟! إذا كان العمدة نفسه ماعملهاش
- نصحى** : انت مالك ومال العمدة.. احنا دلوقت فى الفلوس.. رزق وجايلك حتاخده ولا مش حتاخده
- ربيع** : وانت متزرزr ليه؟! هى فلوسك ولا فلوس الكلب
- نصحى** : لا فلوس الكلب
- ربيع** : خلاص هاتها

- مداح :** (يعطى النقود لجابر ومرعى) خد يا مرعى وانت كمان يا جابر
- مرعى :** يدوم العز
- جابر :** (لمرعى) برضه انت مصدق الحكاية
- مرعى :** وما اصدقش ليه ما الفلوس معنا اهه .. فلوس دى ولا مش فلوس .. ده يثبت ان الكلب ده محترم
- جابر :** برضه مش خايله عليه الحكاية دى يا مرعى
- مرعى :** لك حق ما انت مابتتفرجش ع الدش .. ده فى بلاد بره.. الكلاب بتمثل أفلام أجدع من أجدعها ممثل
- جابر :** ياجدع الدش حاجة والى احنا فيه حاجة تانية
- مرعى :** ولا تانية ولا تالته.. اقولك .. عايز تفهم؟
- جابر :** ايوه يا مرعى عايز افهم
- مرعى :** اشترى لك دش
- حمزاوى :** خد يامروان فلوس تجيب لك ييجى ميت كتاب.. حكم الكلب عارف انك بتحب تقرا زى همام
- مروان :** طول عمرها البنى ادمين هى الى بتعطف ع الكلاب.. لكن عمرى ما شوفت كلاب بتعطف ع البنى آدمين
- حمزاوى :** ده فى الكتب بس.. لكن فى الحياة كل شئ جايز

- مروان** : وانا ماتلزمنيش فلوس الكلاب
- حمزاوى** : عمو ما لو فكرت حقك محفوظ
- ترمسه** : (لبدرية وهى تعطيها ملابس وفلوس) هيصى.. هدية من الكلب
- بدرية** : سلمى لى عليه وبوسيهولى من هنا ومن هنا
- ترمسه** : يوصل يا بدرية
- بدرية** : وقوليله ان انا بحبه قوى.. وياريت تجيبى لى منه صورة
- ترمسه** : ليه حتعملى له عمل؟!
- بدرية** : لا حاعلقها جنب السرير
- سعدية** : وانا الكلب ما افتكرنيش
- ترمسة** : وهو يقدر ينساكى يا سعدية (تعطيها ملابس ونقود)
- سعدية** : باقولك إيه يا ترمسه.. ماتخذنيش معاكى اشوفه
- ترمسة** : بعدين يا سعدية.. اصله مشغول قوى الأيام دى
- شмбаوى** : المال عمى العينين .. لكن الحقيقه فين
- نصحى** : (حفظ) خد يا حفظ حاجة بسيطة كده من الكلب
- حفظ** : والله.. انا من ساعة ما حلقت له قولت عليه ابن اصول
- نصحى** : ده من اصلك

حفظ

: يا سلام على نباهته.. كنت وان باحلق له اقول له دماغك

يمين يجيها يمين.. دماغك شمال يجيها شمال.. وللأمانة

عمره ماوطى.. كنت انا الى باوطى.. امال.. ده الكلب باشا

.. وحياة ابوك يا استاذ نصحي السلام امانه .. ده واحشنى

قوى

نصحي

: يوصل يا حفظ

كستبان

: انا واثق يا استاذ حمزاوى انه اول ما يشوفنى جيعرفنى على

طول

حمزاوى

: طبعاً وهو الكلب بينسى حباييه (يعطية نقود)

كستبان

: يا سلام عليه وهو بيقيس البدلة.. جسمه جسم مانيكان..

والله.. باشا باشا يعنى .. إيه رأيك.. اجهزله بدلتين جداد؟

حمزاوى

: جهزله يا اسطى كستبان

ترمسه

: خدى يا ام رزه حته القماش دى

ام رزه

: والنبي يا ترمسة الكلب ده يفهم .. ومابعتش لرزة ؟

ترمسه

ودى حاجة تفوته .. حاجة رزه ايه

شملول

: خد يا معلم شغته عشان تبقى توضب اللحمه الى بتبعتهاله

شغته

: اسأله يا استاذ شملول.. ده انا بابعثله انضف حاجة .. يدوم

العز.. ربنا يعليك كمان وكمان

- شملول** : شکرا یا معلم
- شغته** : الدعوة دی مش لیک
- شملول** : امال لمین؟
- شغته** : للکلب
- نانی** : (لزعلوک) شایف الناس مبسوطه ازای
- زعلوک** : ان شاء الله ربنا حیکرمک آخر کرم .. خلی بالک .. الکلب ده
وفی قوی .. عمره ما حینسی الی بتعملیه عشانه .. ده بیحبک
قوی
- حمزاوی** : (للشیخ فتاوی وهو یعطیه رزمة من النقود) خدی یا شیخ
فتاوی ولا تنسانا من الدعاء
- فتاوی** : ان شاء الله ربنا حیکرمه آخر کرم
- حمزاوی** : برکاتک یا شیخ فتاوی
- فتاوی** : انا لسه امبارح شایف له رؤیه انما ایه .. حلوه قوی
- حمزاوی** : خیر یا شیخ فتاوی
- فتاوی** : خیر اللهم اجعله خیر .. شوفت الکلب رامب ده وهو هالل
علیه .. وشه منور .. وشعره ابيض فی ابيض .. وقدامه
عضایه بیضة .. أول ما مسکها ببقه .. اتحولت لذهب
- حمزاوی** : لا اله الا الله

- فتاوی** : ایوه .. ما هو ده کلب مولود وفي بقه عظمة دهب
- حمزاوی** : خد المبلغ ده کمان یا شیخ فتاوی .. ویاریت بلاش حکایه ان
الکلاب بتنجس وتنقض الوضوء
- فتاوی** : یا استاذ حمزاوی ده کلب عایش فی قصر .. حتجیله النجاسة
منین .. الکلام ده ينطبق على الکلاب الضالة الی مالیه
الشوارع
- حمزاوی** : ما بلاش الکلاب خالص .. احسن یطلع فیهم واحد من
قرايیه
- فتاوی** : عندك حق .. ازای فالتنی الحکایه دی
- شمبراوی** : المال خلی الكل مال .. والکلب بقی سید الناس .. وارقص
للکلب فی دولته .. وبوس دماغه وجزمته
- عکشة** : (لزقلیطة) خد الکلب بیسلم علیک
- زقلیطة** : نفسی ابوسه (وهو یقبل الفلوس) ده واحشنی قوی
- مداح** : (لزقلط) خد الکلب بیحبک
- زقلط** : وانا باحبه اکثر والله .. حناکل لحمه یا ولاد .. ربنا یخلی
الکلب
- عنطوظ** : باقولک إیه یا مداح .. الفلوس دی قرض ولا منحة؟

- مداح :** ولا قرض ولا منحه.. الفلوس دى عشان الكلب بيحب الكفر
- عنطوظ :** (وهو يريد ان يأخذ الفلوس) بس حكاية الكلب دى....
- مداح :** يا عم عنطوظ.. هى فلوس الكلب آه.. بس انا الى باديهالك
- عنطوظ :** اه.. اذا كان كده معلش (يأخذ الفلوس)
- نصحى :** (لدقدق) خد يا اسطى دقدق
- دقدق :** بس الكلب قالك ادى الفلوس دى للاسطى دقدق؟
- نصحى :** امال انا الى جى من نفسى!!
- دقدق :** بصراحة مش مريحانى الحكاية دى
- نصحى :** (يأخذ منه النقود) خلاص مدام مش مريحاك ماتاخدهاش
- دقدق :** (يأخذ النقود مرة اخرى) يا اخى باخد وادى معاك فى الكلام.. انت مالك حمقى كده وخلقتك ضيق
- نصحى :** ما انت عين فى الجنه وعين فى النار
- دقدق :** قلة المال هى النار.. ده ما فيش اجدع من الكلب (تدخل رزه)
- امراة :** انتى فين يارزه تعالى خدى نصيبك
- ام رزه :** (تعطى رزة الفستان والنقود) خدى يا رزة.. الكلب باعتهم لك

- رزة** : يا حلاوة يا اولاد (تذهب إلى همام) مش قولت لك حتتعديل
يا همام
- همام** : ارمى الى فى ايدك ده يا رزه .. الكلاب ما بيدوش حاجة
ببلاش
- رزة** : تقصدايه؟
- همام** : كل حاجة وليها تمن
- رزة** : لكن ده رزق وجالنا
- همام** : الرزق ربنا بيعته يا رزه لما ناخذ بالأسباب ونشتغل ..
الهدوم الى عليكى أجمل بكثير من هدوم الكلب
- رزه** : حاضر يا همام
- (تذهب إلى أمها وتعطيها النقود والفستان) خدى يا امه همام
مش راضى انى اخدهم
- ام رزة** : يعنى لا يرحم ولا يسيب رحمة ربنا تنزل .. على رأى المثل
فقر وعنطظة
- رزة** : خلاص بقى يا امه
- شملول** : خد يا همام
- همام** : شيل الفلوس تانى يا أستاذ شملول .. ما تلزمنيش
- شملول** : حد يقول للنعمه لا؟!!

- همام** : النعمه عمرها ما بتيجي ناعمه.. بتيجي بالشقى والعرق..
المال ده متغمس بدم وعرق الغلابه
- شملول** : ماتزودهاش يا همام
- همام** : انتوا الى زودتوها قوى.. واكيد الكلب ده عايز حاجة من
أهل الكفر
- شملول** : وهم اهل الكفر حيليتهم حاجة!
- همام** : حيليتهم روحهم الى مش حتقدروا تشتروها بالفلوس
- شملول** : ما انت شايف الناس كلها قدامك ايه فرحانه
- همام** : بيتهيا لك.. مسيرهم يفوقوا
- شماوى** : هو هو هو هو هو هو.. الكلب باشا واكل الجو
- (يدخل منسى ورمانة بعربة يد محملة بشنط الزيت والسكر)
- عكشة** : الزيت والسكر يا اهل البلد
- (جميع الأهالى يلتفون حول العربة بينما يقوم حمزاوى وحاشيته بتوزيع الشنط عليهم)
- (الأهالى فى امتنان يدعون للكلب)
- (يدخل العمدة ومعه الغفر)
- العمده** : (لنانى) هه يا ست هانم.. انا شايف أهالى الكفر منعنشين
كده وفرحانين

- نانى** : ولسه يا عمده
- العمدة** : ازيك يا وله يا زعلوك (زعلوك يتجاهل العمدة)
- نانى** : العمدة بيكلمك يا زعلوك بيه
- العمدة** : ازيك يا وله يا زعلوك بيه
- زعلوك** : (بعظمة) اهلا يا عمدة.. ادى العمدة نصيبة يا حمزاوى زى الكلب ما قالك
- حمزاوى** : خد يا عمده (يعطيه رزمة نقود) الكلب بيعزك قوى
- العمده** : ابن اصول .. طب والحاجات الى بيوزعوها دى! (مشيرا لشنط الزيت والسكر)
- نصحي** : فيه عربية راحت لك على الدوار يا عمدة.. عشان الغفر وحبابيك
- العمدة** : ولزومه إيه التعب ده بس .. وحياتك تشكر لى سيادة الكلب.. وتقول له.. انا مستنى زيارة جنبه فى أى وقت
- حمزاوى** : ان شاء الله يا عمده .. وعازب ابشر أهالى الكفر ان الكلب أمر بعمل مشاريع كتيرة لأهل الكفر .. وفيه خير كتير
- الاهالى** : (تهتف) يعيش الكلب رامب .. وخير الكلب رامب
- مروان** : عاجبك الى بيحصل ده يا همام.. هى حصلت يدعوا للكلب

همام : وهى الكلاب حييى من وراها خير يا بلد .. ومالكم
اتسعرتوا ع الفلوس من غير حتى ما تفكروا .. مافيش
حاجة ببلاش

الاهالى : الفقر وحش .. عايزين ناكل لحمة .. حيحصل إيه يعنى ..
احينى النهارده

العمده : ما تتلم يا وله وتقصر الشر وتدعى للكلب

همام : الشر مالى البلدا يا عمده .. مابقاش الا الكلب عايزنى ادعيه
.. والله لما يموت

العمده : موتك تاخذك وتاخذ الى شبهك .. الكلب ده سيدك وسيد
البلد كالاتها

همام : سيدك انت يا عمده .. لكن انا سيد نفسى .. وعمرى
ما اطاطيها لا لكلب ولا لعبد

العمده : يا سنه سوخه .. بترد عليه يا واد يا همام .. بتتجراً وتعلّى
صوتك قدامى يا ابن الحداد .. (يضع يده على قلبه) قلبى
(يسقط على الأرض)

شيخ الخضر : (يقوم بالقاء القبض على همام) ده انت يومك مش معدى ..
ده انت سنتك اسود من طين البرك

رزه : شيل ايدك انت وهو

- همام** : ابعدى انتى يا رزه.. ماياخدش الروح غير الى خالقها
- شيخ الغفر** : خلى بنتك تتلم يا ام رزه
- نانى** : سيبه يا شيخ الغفر .. انا عايزاه فى القصر
- شيخ الغفر** : (ينظر للعمدة) ينفع يا عمدة؟
- العمدة** : (يشير له برأسه علامة الموافقة وهو ملقى على الأرض)
- رزه** : (تصرخ) همام
- نانى** : ماتخافيش عليه يا حلوة.. حابقى ارجعهولك

إظلام

مشهد هـ

القصر

- نانى : إيه يا همام .. مين بس اللى مزعلك ؟
- همام : ما حدش يقدر يزعلنى
- نانى : طبعا .. وهو فيه حد يقدر يزعل همام الحداد (تلف حوله فى إعجاب متفحصة عضلاته) تشرب ايه ؟
- همام : ولا حاجة .. كفاية اللى احنا شاربينه
- نانى : انا مش طرف فى اللى بينكم وبين العمدة (تعطيه كأس) خد اشرب
- همام : مابشر بش
- نانى : انت بخيل ولا إيه؟! .. مع انك ابن بلد وشهم .. وولاد البلد مايكسفوش ست حلوة زيي
- همام : خلصينى يا ست هانم ورايا شغل
- نانى : طب ماتزقش .. كل أهالى البلد فرحانين ومبسوطين باللى الكلب عمله معاهم إلا انت ؟

همام : كل واحد مسؤول عن تصرفاته.. وانا حر.. أزعل أفرح
أرفض.. أنا حر

نانى : طبعاً حر .. بس انت شاب.. وعائز تكون نفسك ومحتاج
المال!

همام : الى ليه عقل ودراعات مايقولش لحد هات

نانى : (فى محاولة لإغرائه والتقرب منه والتحرش به بينما هو يصد
ويبتعد) إيه رأيك لو تعيش هنا فى القصر

همام : وايه المناسبة؟!

نانى : شغل.. عايزاك تشتغل معايا.. بصراحة شاب زيك مايتسابش

همام : ماليش فى شغل القصور .. طول عمرى باحب الشارع..
وباحب الناس الى فيه

نانى : حد يرفض يعيش فى قصر؟!

همام : مابقاش لها قيمة بعد ما عاشوا فيها الكلاب

نانى : حاعملك سيد الكفر ده

همام : مافيش سيد وعبد.. كلنا ولاد تسعه.. بس فيه بنى آدمين وفيه
كلاب

نانى : لسانك طويل وعائز قطعه .. (وهى تنظر إليه باشتهاء) لكن
شجاعتك وقوتك تغفر لك

همام : اللقمة الى من غير عرق وشقى ماتبلعش.. ولو أصحاب

القصور بطلوا يسرقوا الغلابة.. مش حييقي فيه حد فقير ..

كده أنا اتأخرت على الورشة

نانى : طب اسمع (وهى تلمس يده فى رفق) عايزاك بإيديك

الحلويين دول .. تعمل لى سور حديد حوالين القصر .. واللى

حتقول عليه حاديك أضعافه

همام : آسف .. ماتعلمتش اصنع اسوار .. وفّرى فلوسك.. الشعب

فى القلوب عمره ماكان فى الجيوب

نانى : (بغضب) انت إيه! مابتحسش!.. مابتفهمش! .. مش بنى

آدم!!

همام : اهى دى الحاجة الوحيدة الى املكها ومتأكد منها كويس ..

انى بنى آدم

نانى : (تصرخ فيه) بره.. أخرج بره

(يخرج همام)

نانى : (فى غل وغيظ) طيب يا همام.. إن ماحرقت قلبك .. إن

ماخليتك تركع زى الى قبلك والى قبلك.. إيه؟! .. ايه

يا نانى؟! .. إيه بيحصل ده؟! .. ده انتى عمرك ماخطيتى

عينك على حاجة غير لما خدتها.. إن ماوريتك يا همام

- زعلوك** : (يدخل زعلوك صارخاً في فزع) يا نانى .. الحقينى يا نانى
- نانى** : فيه إيه يا زفت؟!
- زعلوك** : مالك يا نانى؟
- نانى** : نانى هانم يا حيوان
- زعلوك** : هو فيه ايه؟! ومالك كده قلبتى زى الأول؟!
- نانى** : انطق عايز إيه اخلص
- زعلوك** : الكلب رامب!
- نانى** : ماله؟
- زعلوك** : مش لاقيه
- نانى** : يا نهارك اسود.. وانت ازاي تسببه لوحده؟!
- زعلوك** : ما انتى اللى قولتلى سببه وخليك جنبى ماتسيبنيش
- نانى** : (منادية) يا منسى .. يا رمانة
- (يدخل الجميع)
- حمزاوى** : خير يا نانى هانم؟!
- نانى** : رامب اختفى
- الجميع** : ايه؟!
- نانى** : اقلبوا القصر عليه .. يلا .. مستنين إيه (الجميع يسرع بالخروج) استنى انت يا حمزاوى

- حمزاوی :** فيه إيه يا هانم؟! أول مرة اشوفك بالعصبية دى
- نانى :** بسبب اللى احنا فيه ده.. بسبب الكلب
- حمزاوی :** (بذات مغزى) انهى كلب؟!!
- نانى :** الكلب اللى اختفى يا حمزاوى.. وبلاش تلميحائك المقرفة دى
- حمزاوی :** دى مؤامرة يا هانم
- نانى :** تقصد ايه؟
- حمزاوی :** الاختفاء تم بفعل فاعل
- نانى :** لازم نبلغ العمدة .. لازم يتصرف هو ورجالته.. ويشوفوا مين اللى عمل كده ويرجعوه.. لازم رامب يرجع يا حمزاوى
- .. والا حيتهد كل اللى بنعمله
- حمزاوی :** للأسف يا هانم.. عمدة الكفر تعيشى انتى
- نانى :** انت بتقول إيه؟! إزاى.. وامتى؟!!
- حمزاوی :** من نص ساعة بس جانى الخبر
- نانى :** ده إيه اليوم الاسود ده .. كل المصايب فى يوم واحد.. اتصرف يا حمزاوى.. برج من عقلى حيطير .. لازم رامب يرجع.. لازم يرجع
- شمولة :** (تدخل شملولة) مش حيرجع يا نانى
- نانى :** شملولة؟!!

- شملولة** : ايوه شاملولة الى عايزه تاكلى حقها
- نانى** : انتى الى خطفتيه؟!
- شملولة** : مش بالظبط .. هو الى زهق منكم وعايز يانسنا شوية
- نانى** : حقيرة
- شملولة** : مش احقر منك
- حمزاوى** : طلباتك يا شاملولة هانم؟
- شملولة** : نص الثروة
- حمزاوى** : بس ده كثير
- شملولة** : تبقى الثروة كلها
- نانى** : انتى بتحلمى
- شملولة** : وماله .. من حقى احلم بمال اخويا
- حمزاوى** : بس دى مش طريقة تفاهم
- شملولة** : هو ده الى عندى .. شاوروا نفسكم وابعتولى
- نانى** : آه يا نصابة يا حرامية (تحاول التهجم عليها)
- حمزاوى** : (حمزاوى يمنعها) ارجوكى يا نانى هانم تمالكى أعصابك ..
- (لشملولة) اتفضلى انتى يا شاملولة هانم .. وان شاء الله
- حتتفاهم .. واكيد حنوصل لحل
- نانى** : وبعدين يا حمزاوى؟!

حمزای : نحاول نعرض عليها جزء من الثروة .. او نديها الميت فدان

الى فى الزمام الى كانت طمعانه فيهم

نانى : (بثقة وقد توصلت الى حل) لا .. مش حاديها حاجة .. دى

فلوسى انا .. ومش حافط فى ولا مليم من هنا ورايح .. الا

اذا كان حيجيب اكر من قيمته

حمزای : مش فاهم؟! احنا فى مصيبة يا نانى هانم

نانى : صحصح يا حمزای .. لان الكلام الى حقولهولك ده خطر

ومهم

(يظهر منسى ولكنه يتوقف متلصصاً ليستمع)

حمزای : للدرجة دى

نانى : ماتقاطعنيش .. تلف الكفر انت ونصحى .. وتجيولى كلب

شبه رامب بالظبط

حمزای : كلب شبه رامب .. مش فاهم!!

نانى : مش مهم تفهم .. انت تنفذ وبس

حمزای : فهمت .. طب وحقنق الناس ازاي؟!

نانى : ومن امتى الناس بتعرف الى بيدى .. الناس ما تعرفش غير

الى بتاخده

حمزای : يعنى مش حيفرق معاهم الكلب

- نانى : الى يفرق معاهم هو مال الكلب
- حمزاوى : ممكن برضه
- نانى : الشحات الى بتديله حسنه.. بتبقى عينيه على إيدك وعلى الى
حتديهوله .. عمره ما يبص لوشك .. دايا الإيد الممدودة
راسها مطاطية
- حمزاوى : فى دى عندك حق
- (يظهر زعلوك ويهم بالدخول فيمنعه منسى ويجذبه بجواره)
- نانى : اسمع الى باقولك عليه وماتضيعش وقت
- حمزاوى : طب وزعلوك؟!
- نانى : زعلوك إيه ده الى حنعمل له حساب .. زعلوك خلاص..
مش ناقص غير الورقة الى قولت لك تمضيه عليها
- حمزاوى : التفويض؟!
- نانى : ايوه .. تفويض منه لينا بالتصرف فى كل ثروة الكلب
- حمزاوى : وبعد مايمضى؟!
- نانى : يرجع لمكانه الطبيعى مع الخدم .. او يغور فى اى داهية تاخده
هو والكلب بتاعه
- حمزاوى : انتى جنسك إيه يا هانم؟!
- نانى : (بثقة وغرور) هانم..(فى حسم أمرة) يلا يا حمزاوى

همزاوی : حاضر یا هانم

(يخرج همزاوی ونانی بینما یدخل زعلوك ومنسى اللذان كانا يتلصصان على حديثهما)

زعلوك : دى اخرتها يا نانى! .. ليه يا نانى؟! .. تغدرى بيه ليه؟! ..
تغدرى بيه ليه يا نانى?!

منسى : اهدى يا زعلوك

زعلوك : اهدى ازای .. دى كانت بتقول لى بحبك يا زعلوك .. بحبك يا زعلوكتى .. عارف يعنى إيه زعلوكتى؟! .. ده عمر ما حد قلها لى .. كانت بتحببى يا منسى

منسى : وهو الحب بييجى فجأة يا زعلوك .. ما انت مرمى قدامها بقى لك سنين

زعلوك : امال إيه؟! .. انت ماتعرفش اللى كان بينى وبينها !

منسى : عارف كل حاجة يا زعلوك

زعلوك : ولما انت عارف .. تبقى أكيد عارف انها بتحببى .. ولا تكون إيه يا منسى؟! .. تكونش بتحب الكلب?!

منسى : لا وانت الصادق .. بتحب فلوس الكلب

زعلوك : ده الكلب لو اكلته يومين .. يحفظ لك المعروف سنين .. وعمره ما يغدر بيك .. الناس حصل لها ايه?! ..

منسى : الناس كده من زمان يا زعلوك.. بس انت الى كنت حابس
نفسك مع الكلب

زعلوك : طب اعمل إيه .. اعمل إيه يا منسى؟!

منسى : اعمل عييط .. كأنك ما سمعتش حاجة.. وماتمكنهمش من
ثروة الكلب.. واوعى تمضى على حاجة

زعلوك : طب والى مضيت عليه؟!

منسى : الى مضيت عليه خلاص .. هم عملوا المشاريع للناس عشان
يعرفوا يسرقوا .. بس على الله يشبعوا .. المهم الى جى

زعلوك : بس دى قالت لى بحبك

منسى : فوق يا زعلوك .. فوق.. قبل ماتترمى مع الخدم.. سامع..
الخدم

زعلوك : بس دى قالت لى بحبك .. بحبك يا زعلوك.. وانا قولتلها
بحبك يا نانى .. بحبك يا نانى

(يسمع صوت منسى بلاى باك وتمتزج كلماته بصوت منسى
فى حالة هستيرية)

ص منسى : فوق يا زعلوك .. فوق.. قبل ماتترمى مع الخدم.. سامع..
الخدم

إظلام

مشهد ٦

السوق

- شмбаوى : (فرحاً يرقص) هيه هيه.. العمدة مات هيه
- فتيحة : أول مره اشوفك فرحان يا شмбаوى
- شмбаوى : العمدة ابو كرش يساع الكفر.. مات مات وراح القبر
- حفاط : الله يرحمه كان رجل طيب
- دقدق : ولا طيب ولا نيلة.. ده كان راجل كرشه واسع
- شغته : يا اخوانا اذكروا محاسن موتاكم
- همام : مش لما تكون ليه محاسن.. ده حتى محاسن اتجوزت
- كستبان : هو الموت حد يفرح فيه يا همام.. ده حتى عيب عليك
- همام : عيب على اللى زيك.. اللى بيمحلسوله يا ترزى الكلاب
- كستبان : ماشى يا همام
- عنطوظ : بيقولوا ابنه حيمسك العمدة.. أهو شباب برضه وكله طاقه
- همام : وهى الحية حتخلف إيه غير تعاين يا عنطوظ
- كستبان : تكونش انت اللى عايز تبقى عمدة يا همام؟!

- همام** : أنا لا عايز ابقى عمدة ولا شيخ غفر .. أنا عايز اشوف آخر للظلم .. لكن امتى بس
- سعدان** : مش مهم مين الى يبقى العمدة .. المهم نلاقى الكيف
- دقدق** : وايش عرفك .. ما يمكن ابنه يمنع الكيف
- سعدان** : يبقى مش عايزينه
- مرزوق** : انا اول ما ابنه حيقي عمدة .. حاقول له انا عندى عيال عايز ااكلهم .. فك إيدك شوية
- ربيع** : عشم إبليس فى الجنه يا مرزوق
- مروان** : انتوا فاكرينها إيه .. بقرة حيورثها
- همام** : طبعاً بقرة .. لأ وإيه مليانة لحم ولبن .. مش ابوه كان بيحبها .. يحلبها هو رآخر
- زقليطة** : ابنه مين الى يبقى عمدة!
- زقلاط** : امال مين يا وله؟
- زقليطة** : انت عمرك شوف العمدة وزع علينا مال ولا هدوم ولا زيت وسكر؟!
- زقلاط** : لا
- مرزوق** : ولا عمره حصل
- زقليطة** : ولا ابنه حيعمل كده
- زقلاط** : صح

مرزوق : عندك حق

زقليطة : الى يبقى عمدتنا بصحيح .. هو الكلب رامب

زقلط : والله براوة عليك يا وله

جابر : براوة إيه ونيلة إيه .. لا طبعاً.. الكلب ما ييقاش العمدة

مرعى : وما ييقاش ليه يا جابر .. ده فى بلاد بره.....

جابر : (مقاطعاً) بلا بلاد بره بلا بلاد جوه .. داهية تاخدك انت

والدش بتاعك

فتيحة : مش هم بس الى يقولوا كده يا جابر .. كل الكفر يقول كده

سعدان : ياه .. الكلب حييقى عمدة .. امال العمدة حييقى إيه؟!

شمباوى : الكلب حييقى عمدة .. هو هو هو

زقليطة : (يقود الأهالى بالهتافات) عمدتكم مين؟

الاهالى : الكلب رامب

زقليطة : وحبييكم مين؟

الاهالى : الكلب رامب

(يخرج الاهالى بالهتاف للكلب رامب العمدة الجديد ماعدا

همام وربيعة ومروان وجابر)

(تدخل شملولة ومجموعتها بالكلب رامب)

ضبش : وآخرة اللعبة الى بتلعيها يا شملولة!

- شمولة** : حاتشوف يا ضبش
- ضبش** : انتى بتلعبى بالنار
- شمولة** : ما تكسّرش مقاديفى .. انت تعمل اللى باقول عليه وبس
- فتنه** : بابا عنده حق
- شمولة** : اخرسى
- مغاورى** : يا ماما انتى ماعرفتيش تساوميهم على الثروة.. لازمته إيه نصرّ ان الكلب يبقى معانا .. نرجعه أحسن .. وأكيد حيدونا جزء مش قليل من الثروة
- شمولة** : المال مال اخويا وانا احق بيه.. واللى منكم مش عايز حاجة ماياخدش
- سهاد** : نفرض نانى واللى معاها اصروا على موقفهم .. والناس اختارت الكلب رامب يبقى العمدة .. وطبعاً زعلوك الوصى على ثروة الكلب مع نانى.. فى الحالة دى حنعمل إيه؟
- شمولة** : حيبقى رامب العمدة .. وحنعمل من ورا المنصب اكتر من الثروة اللى معاها.. ومش بعيد نصادر كل فلوسهم
- ضبش** : نانى واللى معاها مش ساهلين يا شمولة
- شمولة** : (بحدة) ضبش

- ضبش** : (ثائراً) بلا ضبش بلا زفت.. حتودينا فى داهية
(يدخل الأهالى بالهتاف)
- زقليطة** : عمدتكم مين؟
- الاهالى** : الكلب رامب
- زقليطة** : وحبييكم مين؟
- الاهالى** : الكلب رامب
- شملولة** : اهه يا بلد.. الكلب رامب اهه.. هو ده العمدة..(تحاول
استعطاف ضبش) قول يا ضبش عشان خاطرى
- ضبش** : رامب رامب العمدة رامب
- شملولة وأولادها** : رامب رامب العمدة رامب
- (تدخل نانى وحاشيتها بالكلب شبیه رامب)
- نانى** : ماتصدقوهاش يا بلد.. دى بتضحك عليكوا .. الى معاها
ده كلب شبه رامب.. لكن مش هو .. رامب الحقيقى هو
الى بيعجبكم.. ويديكم المنح.. ويوزع الفلوس.. ويعمل
لكم المشاريع.. هو ده رامب
- شملولة** : لا هو ده رامب
- مجموعتها** : هو ده رامب
- نانى** : لا هو ده رامب

- حاشيتها** : هو ده رامب
- (يجرى زعلوك على رامب الحقيقى الذى مع شملولة)
- زعلوك** : (يحتضن رامب) رامب حبيبي
- شملولة** : شوفتوا يا بلد.. هو ده رامب الحقيقى
- نانى** : نصحى
- نصحى** : امرك يا هانم
- نانى** : ادى كل واحد من الأهالى مبلغ كبير زى ما امرك رامب
- (نصحى ومجموعته يوزعون على الأهالى رزم النقود بينما يدخل شيخ الغفر ورجاله ليأخذوا نصيبهم)
- فتيحة** : ماتقولنا مين رامب فيهم يا شيخ فتاوى؟
- فتاوى** : ودى عايزه سؤال يا بلد .. الى عنده المنفعة
- مرزوق** : (يجذب زعلوك) تعالى يا جدع انت.. رامب الحقيقى
- أهه(مشيراً ناحية نانى)
- (الأهالى يهتفون لكلب نانى فى سعادة ويلتفون حوله وحول نانى وحاشيتها)
- زقليطة** : رامب رامب يحيا رامب
- الأهالى** : رامب رامب يحيا رامب
- زقليطة** : يعيش العمدة رامب
- الأهالى** : يعيش العمدة رامب

نانى : يا شيخ الغفر

شيخ الغفر : أوامرك يا ست هانم

نانى : اقبض على شملولة والى معاها

شيخ الغفر : أمرك (يقوم شيخ الغفر ورجاله بالقبض على شملولة ومجموعتها)

حمزاوى : (يجذب زعلوك من بين شملولة وحاشيتها) تعالى رايح فين

(زعلوك متمسك بالكلب فيأخذ حمزاوى الكلب من

شملولة ويعطيه لشيخ الغفر) توصل ده القصر

نانى : وانتوا يا كل أهل الكفر.. معزومين فى القصر بمناسبة

تنصيب الكلب رامب عمدة للكفر

(الكل يهتف فى سعادة)

الاهالى : يعيش العمدة رامب.. يعيش الكلب رامب

شمباوى : رضوا ان كلب يحكمهم عشان ياكلوا .. طب ما انا طول

عمرى جعان.. بس ماقولتش للكلب يا سيدى.. يا سيدى

هو هو هو هو

إظلام

مشهد ٧

القصر

زعلوك : (زعلوك يخاطب الكلب وهو ثمل وييده زجاجة الخمر)
إفرح يا عم .. حد قدك .. والله وبقيت عمدة .. انت بقيت
عمدة .. ده الهلباوى باشا بجلالة قدره ماطهاش .. وانت
بفلوسه بقيت عمدة .. كل الناس اختارتك .. طب وانا .. أنا
إيه؟! زعلوك بتاع الكلب؟! .. ولا زعلوك بتاع العمدة؟! ..
ده انا الوصى عليك وعلى الثروة .. انا زعلوك .. الى ماكانش
حاجة .. وهب بقى كل حاجة .. وهب بقى ولا حاجة
(يضحك) نانى والى معاها يا خدوا الثروة .. وانت تاخذ
العمودية .. وانا .. انا اخد بمبة .. افضل طول عمرى
زعلوك .. لا حصلت المال ولا حصلت الكلب .. لا لا يا
رامب .. لا .. انا العمدة .. أيوه .. أنا العمدة .. لا أنا زعلوك
بيه .. لا لا زعلوك باشا .. لا لا أنا العمدة .. صح العمدة
زعلوك .. طيب يا دنيا ان ماوريتك زعلوك حيعمل إيه
(يضحك)
(تدخل نانى ونصحى وحمزاوى)

- نانى** : زعلوك! .. إيه اللى بتعمله ده؟!
- زعلوك** : ايه يا نانى .. لأ .. إيه يا نانى هانم .. (يقدم لها الزجاجاة)
تاخدى بق؟
- نانى** : ما باشربش
- زعلوك** : (يصرخ) كدابة (بهدوء) بتشربى .. امال مين اللى علمهالى؟!
- نصحى** : زعلوك بيه .. مافيش وقت .. النهارده حفل تنصيب رامب ..
وزمان أهل الكفر جاين
- زعلوك** : طبعاً .. الكل لازم يحتفل بالعمدة .. وانا كمان لازم احتفل
- حمزاوى** : زعلوك بيه .. عايزينك بس تمضى لنا على الورقة دى
- زعلوك** : فيها إيه الورقة دى؟
- نانى** : فيها اللى فيها .. وانت من امتى بتسأل؟!
- زعلوك** : اخرسى .. من دلوقت .. من هنا ورايح لازم اسأل .. فاهمه
يا نانى .. من غير هانم يا هانم
- نصحى** : ايه يا زعلوك بيه؟! انت فيه حاجة مزعلاك؟
- زعلوك** : لا لا لا لا .. خالص .. بالعكس انا فرحان ومبسوط .. بس
الكلب رامب قال لى ماتمضييش على حاجة يا زعلوك .. آه ..
هو قال لى كده .. لا لا لا افتكرت .. قال لى ماتمضييش على
حاجة يا زعلوك بيه

- نانى** : انت حستعبط.. هو الكلب بيتكلم !!
- زعلوك** : طبعاً بيتكلم .. امال مين الى قال ندى الناس فلوس؟! ..
- ومين الى قال نعمل لهم المشاريع.. مش الكلب!
- نانى** : الكلب ما بيتكلمش وانت عارف كده كويس
- زعلوك** : خلاص.. قولى لأهل الكفر الكلب مايتكلمش.. ولا اقوله انا؟!!
- نانى** : آه يا زعلوك الكلب
- حمزاوى** : اهدى يا نانى هانم .. كل حاجة بالهداوة .. (لزعلوك)
- اشرب واتبسط يا زعلوك بيه.. ولا يهملك.. انا مش عارف
- اشكرك ازاى على تربيتك العظيمة للكلب رامب.. رعايتك
- واهتمامك بيه هم الى وصلوه للعمودية
- زعلوك** : قولها يا حمزاوى
- حمزاوى** : حمزاوى!!
- زعلوك** : إيه مش عاجبك .. خلاص قولها يا واد يا حمزاوى
- حمزاوى** : لا لا عاجبنى يا زعلوك بيه.. حاضر حاقولها
- رمانة** : أهالى الكفر وصلوا يا ست هانم
- (يتوافد أهالى الكفر للإحتفال حيث يعم جو من البهجة
- والسعادة كل أرجاء القصر فى احتفال كبير بمناسبة تنصيب

الكلب رامب عمدة للكفر . يجلس الكلب على كرسى فى صدر البهو وحوله الحاشية نانى وزعلوك وحمزاوى المحامى ونصحى وشملول واوالاده - مداح وعكشة وترمسه - وحفلط وكستبان وشغته ودقدق وأهالى الكفر ماعدا همام ورزه ومروان. تعزف الموسيقى ومطرب يغنى اغنية للكلب ترقص امامه راقصة حيث تميل على الكلب وهى ترقص الكل يهلل فى سعادة . رمانة ومنسى يوزعون الطعام والشراب على المدعووين)

- حفاط** : (يلقى قصيدة مدح فى الكلب)
- كستبان** : (يلقى كلمة شكر وعرفان مليئة بالنفاق)
- عنطوظ** : (يقول شعر)
- نانى** : (تلقى لكل من ينافق رزمة من النقود) الكلب مبسوط منك
- زعلوك** : اقعدى يا نانى وسيبينى اقول لأهل الكفر عمدتهم الكلب
بيقول إيه
- الأهالى** : بيقول إيه يا زعلوك بيه؟
- زعلوك** : بيقول كلام مهم قوى وعايىزنى اوصلهولكم يا أهالى كفر
هو هو
- الأهالى** : (لغط وهمهمات) كفر هو هو!!

زعلوك : أيوه .. هو ده الاسم الجديد الى اختاره العمدة للكفر .. من هنا ورايح الكفر ده حيبقى اسمه كفر هو هو .. ولازم تعرفوا ان الكلب مبسوط منكم كلكم .. وحيعمل لكم كل الى نفسكم فيه

الجميع : (هتافات للكلب) يعيش الكلب .. يعيش العمدة .. يعيش عمدة كفر هو هو

زعلوك : (يقترّب من الكلب وينحنى وكأن الكلب يحدثه) إيه؟! عايز إيه؟! .. لأ ما يصحش

حفاط : فيه إيه يا سى زعلوك؟

زعلوك : اصله طالب طلب غريب قوى

كستبان : الى يقول عليه ماشى .. ده عمدتنا وولى نعمتنا

حفاط : قول يا زعلوك بيه .. جنبه عايز إيه؟

زعلوك : عايزكوا .. تتعلموا لغته .. تهو هو وايعنى

زقلط : بس كده .. هو هو هو

الجميع : هو هو هو هو هو هو

زعلوك : (يستمع للكلب مره أخرى) لا لا .. ده كتير قوى يا عمدة

حفاط : فيه إيه يا زعلوك بيه .. العمدة عايز ايه؟

- زعلوك** : ليه شوية طلبات صغيرة .. بس مش عارف حتوافقوا عليها
ولا لأ؟!
- مرزوق** : موافقين قبل ما تقول
- كستبان** : قول ماتخافش
- زقلط** : ده الكلب يؤمر
- حفظ** : عينينا ليه
- مرزوق** : ده لو طلب عيل من عيالنا مش حنقول له لأ
- زعلوك** : هو ده كان عشمه فيكم .. يعنى بلاش ان حد يشتم التانى
ويقول له يا ابن الكلب
- دقدق** : ده اللى يقول كده .. يبقى ابن ستين كلب
- زعلوك** : كمان يا اخوانا .. ماينفعش العمدة يكون بديل .. واهل الكفر
مايكونش ليهم ديل
- زقليطة** : يعنى ايه؟
- زعلوك** : يعنى تفصلوا هدموم بديل
- سعدان** : ونجيب فلوس منين للهدوم لمؤاخذه؟
- زعلوك** : الهدوم والقماش والتفصيل وكل شئ على حساب الكلب ..
مش كده وبس .. حمزاوى حيعدى على كل أهالى الكفر .. كل
الى ليه ديل حياخد مبلغ كبير

زقلاط : (يهتف) يعيش الكلب

الجميع : يعيش الكلب..

زقلاط : يعيش عمدة كفر هو هو

الجميع : يعيش عمدة كفر هو هو

(زعلوك الذى يجلس بجوار الكلب يتحرش برمانة)

رمانة : الله .. اختشى

نانى : فيه إيه يا رمانة؟

رمانة : ده الكلب بيتشاقى يا ست هانم

نانى : بيتشاقى!! (بسخرية) لازم عايز كلبه تونسسه

زعلوك : مش شرط يا نانى .. ممكن نشوف له واحدة تونسسه من أهالى الكفر

نانى : واحدة بنى آدمه يعنى؟!

زعلوك : طبعاً.. أمال يعنى حتبقى إيه .. كلبه ؟! ماخلاص..

ماعادش فيه فرق بين الكلب وبين أهل الكفر .. هم منه

وهو منهم .. أمال .. مش عمدتهم!!

إظلام

مشهد

السوق

- همام** : ولسه ياما نشوف يا بلد
- رزه** : انت مستغرب ليه ؟
- همام** : ما هو بالعقل كده .. لبسهم لبس كلاب ماشى .. منع الشتيمة بالكلب ماشى .. لكن كلب يتجوز واحدة ؟ !! اهو ده اللى مش ماشى
- رزه** : أولاً .. ماتقولش عليه كلب .. لأنه بقى العمدة
- همام** : كلب وابن ستين كلب
- رزه** : ثانياً .. ده مش جواز زى ما انت فاهم .. دى حتونسه بس .. شكل يعنى كده قدام الناس
- همام** : ياليلة طين .. كلام إيه اللى بتقوليه ده يا رزه .. ومين مجنونه توافق على كده ؟ !
- رزه** : المجانين كتير يا همام .. ده هيكتبوها عشر فدادين باسمها .. ده غير انها حيبقى ليها كلمة فى القصر .. تحكم وتؤمر وتجيّب اللى نفسها فيه

- همام** : شامم فى كلامك ريحة دخان اقوى من دخان الكور
- رزہ** : يوه يا همام .. يعنى مااتفكش معاك فى الكلام
- همام** : لا.. اتفكى يا رزہ.. بس حاسبى لا تتفكى
- رزہ** : اخص عليك يا همام.. كده برضه!
- (يدخل الأهالى وقد تحولوا جميعاً إلى كلاب. كل منهم ينظر إلى ذيل الآخر ويضحك)
- حفط** : مكتوبالك يا اسطى كستبان يا خياط.. تلاقىك خدت فلوس قد كده من ورا تفصيلك الهدوم ام ديل
- كستبان** : ما انت قوام قوام اخترعت قصة الكلب.. وتلاقىك عملتهم على قلبك قد كده
- عنطوظ** : (يخرج وهو لم يكمل الحلاقة مخاطباً حفط) ما تيجى يا حفط تكمل لى بقيت حلاقة الكلب
- زلطة** : يعنى احنا كده بقينا كلاب ولا لسه بنى آدمين؟!
- زقليطة** : مش مهم احنا إيه .. المهم ناكل يا وله
- جابر** : يا سنه سوخة يا ولاد عمدتنا بقى كلب.. اودى وشى فين من قرايى الى فى البلاد الثانية
- مرعى** : باقولك إيه يا جابر.. ماتعمل لجوء سياسى
- جابر** : يعنى إيه ؟

- مرعى** : يعنى تروح اى كفر من الى جنبنا
- جابر** : انا مش حاسيب بلدى يا مرعى.. ان شا الله حتى لو بقى
العمدة حمار
- مرعى** : انت بتقول فيها .. ده فى بلاد بره.. فيه جمعية اسمها جمعية
الحمير
- جابر** : داهية تقطعك وتقطع الحمير والكلاب واليوم الى شوفت
وشك فيه
- مرزوق** : والله يا اولاد انا لو اعرف ان الديل دهه بيدفعوله فلوس..
انا كنت ركبتة من زمان
- سعدان** : كل واحد يخلى باله من ديله
- فتيحة** : انا مش فاهم يعنى ايه غية العمدة يركب لنا ديول.. هو
عشان هو كلب لازم احنا كمان نبقى كلاب؟!!
- همام** : قربت تفهم يا فتيحة.. احمد ربنا ان العمدة بتاعكم ماكانش
الفيل ابو زلومة.. كان زمانكم كلكم مركبين زلاليم
(ربيع يحمل بقجة ويعتزم الرحيل من الكفر)
- مروان** : رايح فين يا ربيع؟
- ربيع** : مهاجر يا مروان.. لا انا حاقدرا اعمل حاجة ولا حاغير
حاجة.. ولا حابقى بديل زيهم

- مروان** : بقی الحل انک تسیب الکفر؟! :
- ربیع** : اسیبہ لانی مش طایق اشوف المناظر دی :
- ہمام** : کلام ایہ دہ یا ربیع .. طب ماانا مارکبتش دیل زیہم .. لکن
 مش ممکن استسلم ولا امشی واسیب لهم الکفر یبرطعوا فیہ
 زی ما ہم عایزین
- ربیع** : انت غیری یا ہمام .. انت تقدر تستحمل لکن انا ما قدرش ..
 ربنا معاک .. اشوف وشکم بخیر
- مروان** : مع السلامة یا ربیع :
- ہمام** : دہ خامس واحد یسیب الکفر .. وآخرتها یا مروان؟! :
- مروان** : لازم الناس تفوق یا ہمام :
- شہبازی** : کل واحد یخلی بالہ من دیلہ .. مش مهم مین عمدتنا .. بس
 نلاقى ناکل
- سعدیہ** : زی ما باقولک کدہ یا ام رزہ :
- ام رزہ** : یعنی واحده تونس الکلب ازای؟ :
- بدریہ** : تأکلہ .. تشربہ .. تشوف طلباتہ .. تحمّیہ .. تسرح لہ :
- سعدیہ** : عمالین یلفوا الکفر .. ولا واحده عجباهم :
- (تدخل نانی وحمزای ونصحی)
- نصحی** : انتی بتلعبی بالنار یا نانی :

- حمزاوى** : همام مش حيسيينا
- نانى** : واحنا مالنا.. حسابيه حيقى مع زعلوك
- نصحى** : انتى عايزه رزة عشان تخاللك السكة لهما
- نانى** : برافوا .. برافو عليك.. عرفتها لوحدك .. ايوه يا نصحى..
- عشان تخاللى السكة مع همام .. إيه.. عندك مانع؟ .. اصلى
بحبه.. بحب همام يا نصحى .. ارتحت
- نصحى** : (فى ضعف ورجاء) طب وانا.. انا يا نانى.. انا اللى حبيتك
.. وعملت المستحيل عشان ارضيكي
- نانى** : عشان ترضى نفسك.. وخذت الى عمرك ماكنت تحلم بيه
- نصحى** : ده انا سبت بيتى ومراتى وولادى واترمت تحت رجلكى
(يحاول ان يمسكها)
- نانى** : اوعى ما تعصبنيش
- حمزاوى** : خلىنا فى الشغل يا استاذ نصحى.. الكلام مامنوش فايده
- نانى** : (لبدرية) تعالى يا حلوه
- بدرية** : ايه يا ست هانم عايزانى للكلب.. قصدى لجناب العمدة؟
- سعدية** : (لنانى) آجى انا كمان؟
- نانى** : (لسعدية) تعالى

بدرية : ايه الحكاية.. هو ناوى على اربعة يونسوه ولا إيه؟!
(تضحك)

نانى : اسمعيني انتى وهى.. الكلب شاف رزة وعجبته..
وبصراحة مصرّ عليها.. وهى زى ما انتوا عارفين ممكن
ماتوافقش

بدرية : طب واحنا دخلنا إيه؟

نانى : (تعطيها رزمة نقود) تخلوها توافق

سعدية : رزة بالذات راسها ناشفه.. وطالعة فيها.. ولا كأنها بنت
بارم ديله

بدرية : بلاش بارم ديله دى احسن الكلب العمدة يزعل

نانى : (تعطيها رزمة نقود) بالزن دماغها حتلين.. وفيه قد دول
عشر مرات لو وافقت

بدرية : يا لهو بالى

سعدية : ده احنا نخطفها لك

(كستبان وهمام ودقدق)

كستبان : انت الوحيد الى ما فصلتلكش يا همام

همام : ولا عمرك حتفصل لى يا خياط الكلاب

كستبان : ليه يعنى؟! كنت احسن مننا ولا احسن مننا؟!

- همام** : كل واحد ادرى بحاله.. لما ديلك يقع نبقي نتكلم
- دقدق** : وطى صوتك يا همام.. الكفر اتملا جواسيس
- همام** : بقيت بتخاف يا دقدق .. من امتى؟
- دقدق** : من ساعة ما طلع لنا ديل
- همام** : وايه الى رماك ع المر؟
- دقدق** : الى امر منه .. انا قابل غصب عنى .. الحوجة مره
- همام** : ما فيش امر من الذل
- دقدق** : يا همام انا ما كنتش عارف ادفع اجرة الدكان
- همام** : والى انت خدته باليمين.. صرفته بالشمال
- (شغته وزلطة وزقليطة)
- زلطة** : هات بدول لحمه يا معلم
- شغته** : ما ينفعوش
- زقليطة** : ليه يا معلم؟
- شغته** : اللحمه زادت الطاق تلاته
- زلطة** : اשמعنى؟
- شغته** : الحالة الاقتصادية انتعشت والفلوس كترت.. يعنى لازم
- الأسعار تغلى
- فتيحة** : بس ده جشع

شغته : لم لسانك احسن ودينى اخرطك ع الأورمه.. ويلا بقى انت وهو من هنا

همام : اهدى يا معلم .. الناس معذورة .. حتبقي انت والزمن!

شغته : اعمل لهم إيه .. ناس مابتفهمش .. العمدة زود الضرايب .. وانا حادفها منين .. من لحمى؟

همام : لا ما يصحش .. ادفعها من لحمهم!

شغته : سامعين

سعدان : انت صح يا معلم .. اذا كان الحشيش غلى .. يبقى اللحمه مش حتغلى

همام : (للأهالى) مش انتوا الى اخترتوا الكلب عمدة .. اشرىوا يا كفر هو هو

(رزة وبدرية وسعدية)

رزة : لا .. انتوا بتقولوا ايه؟! اروح القصر اونس الكلب

بدرية : يا بت افهمى .. ده انتى الى حتبقي الكل فى الكل فى

القصر .. تؤمرى وتتأمرى وتعملى الى انتى عايزاه

سعدية : والى حتقولى عليه حيتنفذ .. دى ليلة القدر واتفتحتلك

رزة : ولو برضة .. لأ .. انتوا بتقولوا إيه؟!!!

- بدريه** : دول عشر فدادين غير الذهب واللبس والفلوس .. ده غير
ان الى حتطلبليه حاتخديه قبل ماتروحى
- رزه** : طب وهمام؟! ده لو عرف حيدبحنى
- سعدية** : همام حياه خطيبك .. لا هو جوزك ولا له كلمة عليكى ..
وشكله كده عمره ما حيتجوز
- بدريه** : ياريت العمدة كان اخترنى
- سعدية** : ولا اختارنى
- بدريه** : بس هو عايزك انتى
- سعدية** : ودى فرصتك عشان تشرطى
- رزه** : طب اشورامى
- سعدية** : (بقرف) شورىها
- رزه** : العمدة من دون البنات كلها اختارنى يا امه
- ام رزه** : قصدك الكلب
- رزه** : اهم الاثنين واحد
- ام رزه** : لا يارزه
- رزه** : عايزه اشم نفسى بقى يا امه .. وارحمك من بهدلة الشارع دى
- ام رزه** : الشارع انا واخده عليه .. ما اشتكتلكيش منه .. اصبرى
وربك حيفرجها

- رزہ : خلاص يا امه انا حاروح
- ام رزہ : حتروحى فين؟
- رزہ : القصر
- ام رزہ : طب وهمام؟!
- رزہ : زهقت من الفقر يا امه.. هو حرام انى اعيش.. انتى ليه مش عايزه تفهمينى؟
- ام رزہ : حد يسيب الراجل عشان كلب؟!
- رزہ : اسكتى يا امه
- ام رزہ : مش حاسكت .. انا اذا كنت بنقرزك واقولك حتتجزوا امتى.. ده عشان تنحرريه.. مش عشان تخسريه .. لكن همام مايتسابش يا رزہ.. همام راجل .. والكلب اذا كان بقى عمدة هو فى الأول والآخر كلب.. لكن عمره ما حييقى راجل .. ارجعى قبل ما تندمى يا بنتى
- رزہ : اسكتى يا امه بقى.. اسكتى.. اسكتى
- (تخرج رزة وبدرية وسعدية)
- ام رزہ : الحق يا همام.. رزہ راحت القصر
- همام : انتى بتقولى إيه يا ام رزة؟!
- ام رزہ : باقولك الى سمعته.. الحقها يا ابنى

- همام : رزة !! راحت تونس الكلب؟!!!
- ام رزه : مضحوك عليها يا ابني
- همام : لا يا امه .. انا اللي كان مضحوك عليه
- ام رزه : الحقها يا همام
- همام : الوقت فات يا ام رزه.. مابقتش تلزمني
- شمباوى : بحبك يا همام
- همام : اسكت يا شمباوى .. اسكت
- نانى : ما تسكت يا شمباوى .. إيه يا همام سلامتك
- همام : (ينظر إليها فى صمت) أهلا
- نانى : ومالك كده بتقولها من غير نفس؟
- همام : المهم انى قولتها
- نانى : لازم قلبك بيوجعك؟
- همام : قلبى رجلى مالكيش فيه .. انتى عايزه منى إيه؟
- نانى : انت عارف انا عايزه إيه
- همام : اعوذ بالله من الشيطان الرجيم
- نانى : بالحلال
- همام : لا حلال ولا حرام يا ست هانم.. سييبنى فى الى انا فيه
- نانى : مش حاسيك

همام

: يعنى إيه ؟!

نانى

: يعنى شاريك يا همام.. لانى بحبك.. الدور والباقى ع اللى

باعتك

همام

: اخرسى (ويرفع يده ليضربها ولكنه يتوقف)

نانى

: ايه.. حتضربنى يا ابن الحداد .. باشارة من صباعى اخلى

الغفر يقطعوك.. لكن معلىش.. الصبر طيب.. وبرضة مش

حاسيبك يا همام

إظلام

مشهد ٩

القصر

- رزة : انا زهقت يا رمانة
- رمانة : حد يزهمق م العز يا رزة هانم
- رزة : هانم!! على قد ما كنت بافرح بالكلمة دى .. بقت زى الشوك الى بيجرّح فى روى
- رمانة : فيه إيه بس .. مالك؟
- رزة : لا انا حاسه بحاجة .. ولا داريه بحاجة .. كل شئ حواليه مالوش طعم .. لا انا عارفه رايحة فين ولا جايه منين؟!
- رمانة : لسه بتحبى همام؟
- رزة : همام .. وهو انا حببت غيره .. ولا عمرى هاحب غيره .. همام ده عمرى .. روى الى مخليانى عايشه
- رمانة : يعنى انتى كتتى عايزة الفلوس وعايزة همام؟!
- رزة : ايوه يا رمانة .. كان نفسى اقرب البعيد .. واحقق حلمى بيت يجمعنى انا وهو .. بس انا عارفه انه عمره ما كان حيوافق انى اشتغل فى القصر .. رغم ان حالته بسيطة والى يشتغل بيه ما بيكفيش

- رمانه : للدرجة دى
- رزة : واكثر .. همام راجل يا رمانه .. عارفه يعنى إيه راجل؟
- رمانه : كنت عارفه زمان قبل ما اجى هنا .. بس دلوقت نسيت ..
- قلّبتى عليا المواجه يا رزه ..
- رزة : انتى الوحيدة اللى ارتحت لك فى البيت ده .. عشان كده
- بافضفض معاكى
- رمانه : طب اسمعى .. ما ترجعيله
- رزة : ياريت يا رمانه
- رمانه : وايه اللى مانعك؟
- رزة : مش قادره اواجهه
- رمانه : للدرجة دى!
- رزة : الموت اهون عليه من نظرة عتاب فى عينيه .. انا كسرتة يا
- رمانه .. كسرتة لما فضلت عليه كلب (تبكى)
- رمانه : تعالى نكمل كلامنا جوه .. ماينفعش حد يشوفك وانتى فى
- الحالة دى (تخرج رزة ورمانه)
- (تدخل نانى والحاشية)
- شملول : اللى بيعمله زعلوك ده غلط يا نانى هانم
- عكشة : الناس مخنوقة

مداح : كله بيشتكى

ترمسة : ما بقاش يدى الناس وبقى ياخذ

نصحى : ناننى هانم مابقتش فاضيه لنا.. خلاص فيه حاجات تانية
شغلها

نانى : وايه كمان يا نصحى؟!

حمزاوى : ممكن ما تتكلمش يا استاذ نصحى

نصحى : حاضر

نانى : لآخر مرة باحذرك يا نصحى.. لو نظقت بكلمة تانى فيها

تلميح من قريب أو بعيد حيكون آخر يوم لىك هنا.. ومش

بعيد يكون آخر يوم فى حياتك

حمزاوى : يا ناننى هانم أرجوكى .. خليكى معايا .. زعلوك سحب

البساط من تحت رجلينا.. وممكن بسبب قراراته العشوائية

دى.. تطربق فوق دماغنا كلنا.. أرجوكى.. لازم تشوفلنا

حل

نانى : سيونى لوحدى .. مش عايزه اشوف حد (يهم الجميع

بالإنصراف) استنى انت يا نصحى

نصحى : تحت امرك .. ياه من زمان ما قعدناش لوحدنا .. فاكرة يا

نانى؟

- نانى** : خد الحباية دى
- نصحى** : كمان مجهزة الحباية .. دى حتبقى ليلة.. تعرفى ايه الى بيعجبني فيكى؟
- نانى** : ايه يا نصحى؟
- نصحى** : دايا بتعملى حساب كل حاجة
- نانى** : صح
- نصحى** : (يهم بتناول الحباية)
- نانى** : (تستوقفه بحددة) استنى .. انت حتعمل ايه؟
- نصحى** : حاخذها
- نانى** : دى مش عشانك
- نصحى** : امال عشان مين؟
- نانى** : دى عشان زعلوك
- نصحى** : زعلوك!!
- نانى** : تحطهاله فى اى حاجة بيعجب يشربها
- نصحى** : طب ليه؟!
- نانى** : مش شغلك (بحددة)
- نصحى** : بس الحباية دى شديدة جدا.. كفاية ربع

- نانى** : اسمع الى باقولك عليه .. تحط الحباية كلها(تصرخ فى وجهه) يلا
- نصحى** : حاضر .. حاضر (يخرج)
- نانى** : (منادية) رمانة
- رمانة** : (تدخل) ايوه يا ست هانم
- نانى** : خلى ستك رزه تشيك.. وتروح لعزوز بيه تجيبه هو ورامب.. عشان فيه ناس جاين يقابلوا العمدة رامب
- رمانة** : ناس مين يا ستى؟
- نانى** : وانتى مالك انتى .. يلا روحى
- رمانة** : حاضر يا ست هانم (تخرج)
- نانى** : كده تبقى قربت ساعة الحساب .. بكره يا زعلوك الكلب ترجع تانى بتاع الكلب .. اما انت يا همام.. مش حاخليك تتهنى لحظة واحدة فى حياتك .. انا يا همام اترفض؟! ومن مين.. من جربوع شحات زيك .. لازم اجيب مناخيرك الأرض يا ابن الحداد
- ص نانى** : انتى بتجيبه يا نانى
- نانى** : لا لا مابجوش .. مستحيل
- ص نانى** : أمال خطاه فى دماغك ليه؟

نانى : ما اعرفش

ص نانى : عشان قال لك لأ؟

نانى : برضه ما اعرفش

ص نانى : اوعى يا نانى.. اوعى تصحى قلبك.. الحب ضعف..

ضعف.. ضعف

نانى : قلبى مات من زمان.. مات مع أول حب وأول غدر وأول

جرح (تبكى)

ص نانى : فوقى وامسحى دموعك الى عمر ما حد شافها..

وماتنسيش إنك نانى

(تبدأ تتماسك وتمسح دموعها وتسترد عظمتها وقوتها)

(يسمع صراخ رزه)

ص رزه : ايه ده.. فيه إيه .. مالك يا زعلوك بيه

نانى : يبقى حصل (تخرج بسرعة)

(تدخل رزه تصرخ مذعورة ممزقة الملابس يطاردها زعلوك)

رزة : يا ناس.. يا هوه.. الحقونى

زعلوك : انتى خايفة منى ؟

رزه : اوعى تقرب لى .. إيه الى حصل لك؟! .. فيه إيه؟! .. مالك

بقيت زى الشيطان؟!

زعلوك : مالى ومال الكلب ومال الدنيا كلها تحت امرك .. انا باحبك
يا رزه

رزه : حبك برص .. انا حاقول للعمدة

زعلوك : ما انا العمدة

رزه : لا الكلب هو العمدة

زعلوك : انتى صدقتى .. دى لعبه ضحكت بيها ناننى على الناس
وصدقوها .. وانا نفسى صدقتها

رزه : انت كداب .. سكران مش عارف بتقول إيه ولا بتعمل ايه

زعلوك : تعالى (يحاول التهجم عليها. تدخل رمانة وتحاول تبعده
عنها. تتخلص رزة من زعلوك وتضربه بقدمها اسفل البطن
فى موضع حساس)

رزه : (تصرخ فى حالة هستيرية) ابعده

زعلوك : (يصرخ وينحنى من أثر الضربة ويضع يديه على موضع
الضربة من شدة الألم) آه

(رمانة تساعد رزه على الهرب خارج القصر)

إظلام

مشهد ١٠

السوق

- عنطوظ :** الله يخرب بيتك يا عمدة الكلب .. خليتنا شبه الكلاب
- فتيحة :** لا وانت الصادق .. الكلاب احسن
- مرزق :** على الأقل عارفه إنها كلاب
- دقدق :** لكن احنا لا حصلنا الكلاب ولا البنى آدمين
- زلطة :** طب الولاد الى حنخلفها .. حيلبسوا برضه هدوم بديل؟!
- زقليطة :** وليه ما تقولش حيتولدوا بديول جاهزة
- بدرية :** ده اتسعر
- سعدية :** ده طلع اسود من العمدة الى قبله
- حفاط :** جرى ريقنا بالفتافيت وبعدين منعها .. ده حتى مابقاش
- ييجى يخلق عندى
- مروان :** ولسه ياما فى الجراب يا حاوى
- سعدان :** لسه إيه تانى! ده انا قربت افوق
- همام :** وانت لسه ما فوقتش .. امال حتفوق امتى؟!
- شغته :** اهو حالنا وقف .. ولا بقى فيه بيع ولا شرا

- همام** : امال انتوا كنتوا مستنين إيه!! .. قبل ماتفكروا تاخدوا كان لازم تفكروا الف مرة فى التمن
- كستبان** : ماكفاية انت بتفكر وعامل فيها ابو العريف.. قول لنا بقى انت نعمل إيه؟
- مروان** : مش وقت تكسير المقاديف يا كستبان
- همام** : مش حاقدراعمل حاجة لوحدى
- شمباوى** : مش رضيتوا ان كلب يحكمكم.. لازم تبقوا كلاب
- دقدق** : لا يا شمباوى لا.. احنا مش كلاب
- عنطوظ** : احترم نفسك يا شمباوى
- جابر** : (لمرعى) ماتقول لنا يا ابو العريف.. الدش ما قالكش نعمل إيه فى الوحلة الى احنا فيها دى؟!
- مرعى** : قال .. قال ان احنا لو فكرنا فى اذية الكلب.. الجهات الخارجية حتتدخل عشان تحميه
- جابر** : واحنا مين يحميننا يا جالوص الطين؟!
- مرعى** : ربنا
- جابر** : الهى ربنا ياخذك ويريحنا منك
- فتيحة** : والحل يا همام؟
- همام** : الحل فى ايديكم

- سعدان** : ايدينا فاضية ايه مافيه اش حاجة
- مرزوق** : واحنا حيلتنا حاجة.. ده احنا ما حيلتناش اللضا
- همام** : حيلتكم انسانيتكم.. وروحكم.. وارادتكم .. ودى حاجات عمرها مابتموت.. موجوده جوه كل واحد فيكم..
- بس انتوا الى مش واخدين بالكم
- دقدق** : انا معاك يا همام والى يحصل يحصل
- مروان** : وانت يا فتيحة ؟
- فتيحة** : معاك يا همام
- جابر** : وانا معاك
- همام** : احنا كده كده ميتين.. ماعادتش تفرق يا مروان
- مجموعة همام** : ايدنا فى ايدك يا همام
- (تدخل رزة مسرعة لتحتفى بهمام ويدخل فى اثرها مجموعة من الغفر)
- رزة** : الحقنى يا همام الغفر عايزين ياخدونى القصر بالعافية
- همام** : الى حيقرب منها حاكسر ايده
- شيخ الغفر** : ابعد عن سكتنا يا همام
- ام رزة** : اوعى تتخلى عنها يا همام
- همام** : ماتخافيش يا ام رزة .. نهاية الظلم قربت

- مروان** : (يتصدر في المواجهة منضما لهمام) مش همام لواحدته الى في
سكتكم يا شيخ الغفر
- جابر** : قسما بالله يا شيخ الغفر لو قربت ما حيحصلك خير
- شيخ الغفر** : يعنى إيه؟!
- دقدق** : يعنى كله إلا الشرف يا شيخ الغفر
- مرزوق** : هى حصلت الأعراض .. طب انى عايزك تقرب خطوة يا
شيخ الغفر .. تعالى يا وله يا سعدان يا مسطول يا ابن روايح
بتاعة المخروطة.. إيه حتقفوا تتفرجوا وتسيبوه لوحده
- سعدان** : بس ماتقولش مسطول.. انا خلاص فوقت يا عم مرزوق
- عنطوظ** : اجى يا همام
- دقدق** : هو ده وقت تتعنظ فيه يا عم عنطوظ.. ماتيجى
(ينضم بعض الأهالى لهمام بينما تدخل نانى وزعلوك
والحاشية)
- نانى** : ابعده عن رزه وسيبها يا همام.. فيه بينا وبينها عقد واتفاق..
ما تتكلم يا شيخ فتاوى
- فتاوى** : العقد شريعة المتعاقدين
- همام** : اخرس يا راجل يا ضلالى يا الى ما عندكش دين ولا ضمير
- فتاوى** : هى حصلت .. بتغلط فيه يا ابن الحداد

رزه

: الى ما يخافش ربنا.. ماحدث يخاف منه

همام

: مش انت الى قولتلهم سدوا بق الناس تتعمى عينيهم عن

الحقيقة.. وفسرت آيات ربنا على حسب اهواءك.. وبقت

الفتوى سلعة للى يدفع

نانى

: انتوا واقفين تتفرجوا عليه وهو بيخطب.. فيه إيه؟!..

سحركم ولا ضحك عليكم؟!

همام

: لمى كلابك وامشى يا نانى

نانى

: (للغفر) انتوا مستنيين إيه؟!.. الكلب رامب العمدة عايزها

زعلوك

: لا .. ما تصدقوهاش يا اهل الكفر.. دى لعبه وخالت

عليكم.. الكلب مايتكلمش.. هى الى قالت لى اقول ان

الكلب بيتكلم.. وقالتلى اعمل لكم مشاريع واديكم

فلوس.. عشان ماتشوفوش الحقيقة.. والحقيقة انها لعبة..

لعبة اتلعبت عليكم وعليًا.. وانا جاهل ماتعلمتش.. سنين

عايش جوه القصر ما اعرفش غير الكلب.. لا افكرت..

اعرف حاجة تانية.. الإهانة والشتيمة.. ماكتتش اعرف

الكذب والغدر والخيانة.. لكن اول مابيقى وصى على

الثروة.. عرفت حاجات كتير.. عرفت الفلوس ممكن تعمل

إيه.. والبركة فى نانى.. هى الى بدأت اللعبة .. لكن

ماعمלתش حسابها ان التلميذ ممكن ييقى استاذ .. وانا
تعلمت.. وكان لازم اكمل اللعبة للآخر

دقدق : يا ولاد الكلب

زقليطة : بقى هى الحكاية كده (لزلة) يلا يا وله.. دى باينها حكاية

كبيرة (ينضمون وباقى الأهالى لهمام ومجموعته)

نانى : ماتصدقهوش ده كداب .. ده الى حاول يتحرش برزة

ويعتدى على شرفكم

نصحى : لا.. زعلوك مالوش ذنب.. زعلوك اتضحك عليه.. نانى

هى الى خططت ودبرت.. وادتنى حباية احطها له عشان

مايقاش فى وعيه ويتهجم على رزة

نانى : كداب.. ماحصلش.. كلكم كدايين.. كلكم خاينين

مالكوش امان .. مستنى إيه يا شيخ الغفر؟!

همام : ابعده انت ورجالتك يا شيخ الغفر.. واديك سمعت بودنك

.. حتى انت ورجالتك ركبوا لكم ديل

شيخ الغفر : (يشير لرجالته بعدم التدخل)

دقدق : يعنى ضحكتموا علينا وحولتونا كلنا كلاب!!

زعلوك : انتوا الى حولتوا نفسكم لكلاب.. وقبلتوا تعملوا كل حاجة

واى حاجة عشان الفلوس.. انتوا الى من جواكوا كلاب..

انا بس اللى طلعتها بالفلوس .. اوعوا تلوموا حد غير
نفسكم .. ده حتى الحب انداس تحت الرجلين .. ورزة
باعت همام عشان الفلوس .. واللى قعد من شغله .. واللى
اتجوز على مراته .. واللى واللى واللى .. كل ده انا كنت باتفرج
عليه زى صندوق الدنيا

همام : لكن ده مش معناه انك ماغلطتش فى حق الكفر انت ونانى
وحاشيتها

زعلوك : كل واحد مسؤول عن نفسه .. واللى غلط يتحاكم ..
وبالقانون ولا إيه يا استاذ حمزاوى ؟!

حمزاوى : بس ...

زعلوك : مابشش .. الهلباوى باشا كتب الثروة للكلب .. ودى امانة ..
والامانة تترد لاصحابها .. وانتم اصحابها .. ايوه .. انتم
اصحابها .. كل ثروة الهلباوى ابو العز ليكم يا اهل الكفر

دقدق : يعيش زعلوك بيه

الاهالى : يعيش زعلوك بيه

زعلوك : تانى حنهتف للفلوس .. انتو ما تعلمتوش

(يلتف الغفر حول ناننى وحاشيتها ومحاصرتهم)

رزة : (وهى تبكى) سامحنى يا همام

همام : اسامحك على إيه ولا على إيه يا رزة .. اسامحك على الفلوس

الى جريتي وراها .. ولا على النفس الضعيفة .. ولا على
الحب الى دوستى عليه وانتي بتجري عشان تونسى
الكلب .. ولا على الحلم الى اتحطم على اول صخرة تقابلنا ..
طريقك غير طريقى يا رزة

رزة : لا ماتقولش كده يا همام .. انا عارفه انى غلطت .. ودى اول
غلطة .. وحاتكون آخر غلطة

همام : كنت شايفك اقوى من كده بكتير .. وان مافيش موقف يقدر
يهزك

رزة : خلاص يا همام انا اتعلمت .. وحياة الحب الى بينا تسامحنى

ام رزة : عشان خاطرى انا يا همام .. دى رزة غلبانة وبنت حلال
وبتحبك

همام : مسامحك يا رزه

شماوى : (ساخراً) سامحنى يا همام .. مسامحك يا رزة (ناظرا الى همام
فى جدية) ما تبقى انت العمدة يا همام

زعلوك : مش مهم مين يبقى العمدة .. المهم ان العمدة يكون إنسان

ستار

الوصية

وبساطة السهل الممتنع

دراسة نقدية بقلم الناقد الكبير / أحمد هاشم.

في نص "الوصية" يلتقط الشاعر والكاتب المسرحي المتمرس "محمد الصواف" تيمة في غاية البساطة؛ ليشيد عليها بنائاً عملاً مسرحياً يخطئ من يربط بين بساطة التيمة، وبساطة ماعالجه من خلالها.

أما التيمة فهي "الوصية"... مجرد وصية يوصى بها الملياردير "هلباوى أبو العز" لمن تؤول إليه كل ممتلكاته بعد وفاته، وهذا أمر عادى، كثيراً ما يحدث في الواقع، أما غير العادى والمبتكر لدى "الصواف" هو فيمن تؤول إليه تلك الممتلكات، إذ يصدم المؤلف وعى متلقيه بغير المؤلف في واقعنا العربى، حين نكتشف أن تلك الثروة المليارديرية تؤول إلى كلبه المدلل "رامب"، وهى حيلة يلجأ إليها المؤلف بكثير من الفطنة، والحس الفنى المتوهج لا ليدهشنا ولا ليصدمنا؛ بل ليلج عبرها إلى عوالم رحبة وإن كانت تتمحور حول مرتكزين أساسيين غير منفصلين:

المرتکز الأول: هو النفس البشرية فی أدنی صورها لدى بعض النماذج التي لا تتوفر لها السواء النفسی، والوعی الدرامی لدى المؤلف لا يجعله يتصدى لتلك النماذج فی تلك الصورة على امتدادها الأفقی، بل يأتي ذلك فی تفاوت واضح بین الشخصیات وفقاً لواقعها الاجتماعی، والثقافی، ومن ثم تتراوح الرغبات والدوافع، وهو، المؤلف، يتجاوز بذلك الوقوع فی خلع البعد الأحادی، والتنمیط، ویکسبها التمايز حيث لا تعرف الدراما الشخصیات أحادية الأبعاد (سلباً أو إيجاباً — شراً أو خيراً) ومثال ذلك مجموعة شخصیات القصر (الزوجة، شملول وأبناءؤه، شملولة وزوجها وأبناءؤهما، المحامی حمزاوی، نصحی) يتوافقون فی رغبتهم فی الحصول على أنصبة من الميراث، ومع هذا التوافق فی الهدف تتباين الدوافع، وحجم الأطماع، إذ تسعى الزوجة إلى الحصول على معظم الثروة إن لم یکن جمیعها، والشقیقة تسعى إلى الحصول على: "المیت فدان اللی فی زمام الکفر"، بغض النظر عما إذا كان ذلك نصیبها الشرعی والقانونی فی الإرث من عدمه، والشقیق "شملول" يسعى للحصول على أى شئ بالتوافق مع "نانی" حتی لو كان على حساب شقیقته، والمحامی یطمح فی الحصول على نسبة غیر محددة وفق قدرته على شرعنة وتقنین اللعبة القذرة التي یقودها، "نصحی" یطمع فی نصیب من الثروة بدون سند قانونی أو شرعی

يستند إليه، غير ما يراه هو كمكافأة لعلاقته غير الشرعية مع زوجة المتوفى صاحب الثروة، وكأنه يطلب مقابل خيائته مع زوجة المتوفى، الذى كان وليا لنعمته ومتخذاً إياه مديراً لأعماله ليكشف المؤلف بذلك جانباً من أخطأ الجوانب فى منظومة تعقيدات تلك النماذج البشرية .

المرتکز الثانی : هو القدرة الفائقة فى المزج بین، والإحالة من الخاص إلى العام.. إذ أن المجموعة الأخرى من الشخصیات المتجمعة فى السوق (الحلاق، النجار، الجزار، السکیر، أم رزة وابنتها، سعدية، بدرية، همام الحداد، وغيرهم) کل منهم يعانون الفاقة والعوز کممثلين للشريحة الطبقيّة الدنيا فى التراتب الاجتماعی، کطرف نقيض لمجموعة القصر التى نجدها تتصارع بلا نبل بغية الإغتراف من الأموال التى لا تحصى من تركة الملياردير بينما مجموعة السوق فإن سقف أحلامها لا يتعدى مجرد توفير لقمة العيش، وما يستر البدن دون التخلی عن النبل الإنسانى سلوكياً، فهم لا يتورعون عن الالتفاف خلف "همام" حين يدركون نبل غايته فى مقاومته لنانى، ولا يتخلون عنه كذلك فى معركة دفاعه عن "رزة" التى تعرضت لمحاولة انتهاك شرفها، وتعرضه هو لهجوم الخفراء وشيخهم، فأمر شرف "رزة" لا يخصه وحده، ولا يخصها وحدها بل يخص الكفر كله، بل

ويعلمون انضمامهم إليه في معركته ضد شراسة "نانى"، وفي ذات الوقت فهم، وإن كانوا ينتمون إلى المهمشين جميعا، فإنما يعود ذلك إلى هُـب (أصحاب القصور) مما يؤدى إلى خلل فى عدالة توزيع الثروات؛ ليؤكد فى غير مباشرة على أن حالة العوز العامة الواقعة على مجموعة السوق — وهى تمثل الأغلبية — إنما تعود إلى أنهم المجموعة الأخرى ورغبتها فى الحيازة والاكتناز، وليبرز دور العمدة — كممثل للسلطة ورمز لها — فى انخيازه المعلن دون مواربة للقلّة على حساب الأغلبية، لتحقيق الإحالة من الخاص إلى العام ليضيف بذلك، وبتقنية غير مباشرة، أبعادا تجعل من النص أكثر عمقا فى معالجته لموضوعه دون أن يتخلى عن البساطة أيضا، ودون أن ينحاز صوت المؤلف المتخفى خلف أفعال شخوصه، فهو يدين كل الأطراف . إذ تنهار مجموعة القصر وتتكرر تطلعاتها غير العابئة بالغير، ويتحقق ذلك مع صحوة الوعى بالواقع لمجموعة السوق التى تعلن التفافها حول الحداد "همام" صوت الوعى المستشرف لنهايات مصائر مجموعة القصر، وعلى رأسها "نانى" الباحثة طوال الوقت عن إشباع رغباتها الجسدية الملتهبة، وإشباع رغبتها دائمة التآجج تجاه الأموال والثروات، كما يدين بعض أشخاص السوق ليتضح عدم انخيازه لمجموعة دون أخرى ليتسم بالموضوعية، إذ نجد إدانته تلحق بـ "رزة" لضعفها أمام ما سيغدق عليها

من أموال، حين توافق على عملها كجليسة وأنيسة للكلب، حتى لو كان هدفها نبيلًا؛ إذ ترى أنها ستتخطى بتلك الأموال مشكلتها المادية الحائلة دون زواجها من "همام"، وبدلاً من أن تكتسب من "همام" وعيه، وثوريته على الأوضاع الشائثة والشائنة — كأقرب الناس إليه — ومن هنا أيضاً يأتي عقابها — دون غيرها — أكثر قسوة.. فالعقاب يأتي على قدر الفرص المهدرة، وهى بالطبع "رزة" أهدرت فرصة اكتساب الوعي، ومن ثم القدرة على المقاومة لقربها من "همام"، لذا تكون محاولة اغتصابها بمثابة العقاب، وأيضاً الصدمة التي تعيدها إلى عالمها — عالم همام — وناسها في السوق، أما باقى شخصيات السوق فيستشعرون بالذنب، رغم أن الفاقة واحتياج تلبية الاحتياجات اليومية البسيطة هى سبب ما دفعهم لأخذ الأموال المغدقة عليهم من القصر، إلا أنهم أيضاً يتخذون موقفاً سريعاً وبلا تردد حين يكشفون حقيقة ما تسعى إليه مجموعة القصر التي تغدق عليهم أموال بسببها، ويؤجل المؤلف تحولهم إلى وقت اكتشافهم لمحاولة التعدى على شرف "رزة" إذ إن شرفها بمثابة شرفهم جميعاً، وأولاد البلد لا يفرطون في شرفهم؛ فالشرف لازال أحد الأنساق القيمة التي يتمسك بها هؤلاء، وليكون تحولهم، ونبذهم لسليبتهم، والانحياز الى المقاومة حين يتعلق بتهديد شرفهم، ومن ثم يتم ترسيخ تلك القيمة كأحد قيم البسطاء من غالبية

الشعب، وتجيئ في ثنایا العمل وسیاقه الطبیعی بعيدا عن فجاجة المباشرة، ولیمحو ذلك الموقف النبیل منهم (مجموعة السوق) خطیئتهم العظمی باختیارهم للكلب أن يكون عمدة للكفر، ورضاءهم السابق بالمذلة والهوان حين ینصاعون لتلبية أوامر الكلب واسترضائه، حتى لو لزم الأمر بتركيب ذیول فی مؤخرات ملابسهم، واتخاذهم لقصة شعره نموذجاً یتم محاکاته، ونبذهم لتبادل الشتائم الکلبیة (كأن یقول أحدهم للآخر یا ابن الكلب کتقلیل من شأنه) .

ولا یتوقف الأمر عند ذلك لدى "محمد الصواف" فی نصه "الوصیة"؛ بل یتلامس أيضاً مع الواقع الذی أصبح علیه معظم رجال الدین الذین یمثلهم فی النص "الشیخ فتاوی" حين یقر من علی المنبر فی خطبة الجمعة بنجاسة الكلاب، وحين توضع أکیاس الأموال بین یدیه یتراجع عن فتواه فی خطبة الجمعة التالیة، ویستعد لنفی صفة النجاسة عن الكلب "رامب" دون الكلاب جمیعاً، وینبهه أحدهم إلى صلة القرابة التی قد توجد بین "رامب" وأحد الكلاب الأخری، ویدفن بین کفیه کیساً آخر من الأموال یسرع بلا تردد بنفی صفة النجاسة عن الكلاب جمیعاً.. فبالأموال تباع وتشتري الذمم والضمان والقیم، والفتاوی الدینیة أيضاً مثلما كانت تباع

وتشتري صكوك الغفران حين يتخلى رجال الدين، أى دين، عن أدوارهم الحقيقية، ويحولونها إلى مجرد مهنة يحققون من ورائها مكانة اجتماعية، وسلطة ووسيلة ارتزاق يجنى من ورائها الكثير.

ويلجأ الكاتب إلى التكنيك التقليدى البسيط فى بناءه الدرامى لمرئيته "الوصية" ليس لعدم معرفته أو قدرته على تكتيكات أكثر حداثة، وأكثر تعقيدا، وإنما لانحيازَه للبساطة فى طرح موضوعه — على الرغم من أهميته الكبرى — لتجيب تقنيته فى المعالجة متسقة مع موضوعه، وطرحه الفكرى، لتجمع البساطة بينهما، واتساقا مع تلك البساطة أيضا يشكل المؤلف الفضاء المسرحى للنص من منظرين مسرحيين فقط (القصر / السوق) ليساهم بذلك فى بساطة الصياغة البصرية لهذا الفضاء عند تنفيذه كعرض مسرحى، ويكون النص فى كليته بسيطاً، ولكن بساطة السهل الممتنع؛ ليشكل نص "الوصية" واحداً من النصوص العربية الهامة فى مكتبتنا المسرحية.

أهم رمائس

العمال للمؤلف

• صدر له

١٩٨٩	ديوان شعر (بالعامية المصرية)	صور على جدار الزمن
١٩٩٩	مسرحية شعرية (بالعامية المصرية)	لحظات ساخنة
٢٠٠١	مسرحية (دليل النصوص الجزء الثاني)	شيلوك ياهو
٢٠٠٢	مسرحية (دليل النصوص الجزء الخامس)	استعماريكا
٢٠٠٧	مسرحية (دليل النصوص ج الثاني والعشرون)	العملية ٠٠٧
٢٠١٦	”سوق الأونطة – مجانيين عاقلين جداً – اتنين ستات – مافيا بلاأفيا – توتو أوفسيت“	٥ مسرحيات كوميديا من فصل واحد

● الأعمال المسرحية

اسم العمل	المخرج	مكان العرض	جهة الانتاج
١- مدينة الأبواب السبعة	محمد حسن	بور فؤاد	قصور الثقافة ١٩٩٨
٢- بعزائكا	همام تمام	المنيرة/ جيزة	قصور الثقافة ٩٩
	خالد الخربوطلي	ساحل سليم/ اسيوط	قصور الثقافة ٩٩
٣- لحظة حب	ياسر صادق	مسرح السلام	مسرح الشباب ٢٠٠١
٤- مشعلو الحرايق	د.عوني كرومي ٢٠٠٢	مسرح الهناجر	مركز الهناجر للفنون/ الأوبرا
		مسرح الرور ألمانيا	مثلت مصر في مهرجان الرؤية بألمانيا ٢٠٠٢/٩
٥- شايлок ياهو	فهيم الخولي	الاسكندرية	النصر للسيارت ٩٧
	محمد دياب	الغنايم/ أسيوط	قصور الثقافة ٢٠٠٣

هيئة قناة السويس ٩٨	بور سعيد	محمد حسن	٦- استعماريكا
قصور الثقافة ٢٠٠٣	المحلة الكبرى	محمد فتحي	
قصور الثقافة ٢٠٠٤	أبو تيج	محمود الشوربجي	٧- العملية ٠٠٧
إنتاج سعودي ٢٠٠٥	السعودية	بطولة/ أحمد بدير	٨- وحدي في المنزل
إنتاج سعودي ٢٠٠٥	السعودية	بطولة/ حسن مصطفى	٩- مباراة ساخنة
قطاع خاص ٢٠٠٦	فيصل ندا	مجدي الناظر	١٠- يا احنا يا همه
انتاج سعودى ٢٠٠٦	السعودية	مصطفى الصغير	١١- برجوش دوت كوم
البيت الفنى ٢٠٠٩	مسرح الغد	همام تمام	١٢- بعزائيكا

● أشعار مسرحيات ومسلسلات

العمل	المخرج	مكان العرض	جهة الإنتاج
١- مسرحية نقول إيه	فهمي الخولي	مسرح السلام	البيت الفني ٩١
٢- مسرحية الأرنب المغرور	فهمي الخولي	المسرح العائم	البيت الفني ٩٢
٣- مسلسل هدية لماما	حازم عبيس	التلفزيون	التلفزيون ٨٩
٤- مسلسل ترحال	مسعد فودة	التلفزيون	صوت القاهرة ٩٨
٥- مسلسل داليا وسمسم في بلاد العجائب	أسباني	A.R.T	تاميدو للإنتاج ٩٣
٦- مسرحية امس واليوم وغد	ياسر صادق	قصره ١ مايو	قصور الثقافة ٩٩
٧- أشعار مسرحية ميت راحة	محمد دياب	الوادي الجديد	قصور الثقافة ٢٠٠٠
٨- اوبريت حابس الوحش	سيد البنهاوى	الفيوم	قصور الثقافة ٢٠٠٢

القومى للفل ٢٠٠٦	– الأنفوشي –فاطمة رشدي	زين نصار	٩- أشعار مسرحية كوخ الطيبين
البيت الفنى ٢٠١٥	مسرح متروبول	زين نصار	١٠- اشعار مسرحية الرسام الموهوب

• المسرح العمالى

م	العمل	المشاركة	المخرج
١	خشب الورد	اشعار ١٩٨٨	فيصل عزب
٢	ملك الشحاتين	اشعار ١٩٨٩	فيصل عزب
٣	حارة الضحك	اشعار ١٩٩٠	فيصل عزب
٤	نقول طور	اشعار ١٩٩١	فهيمى الخولى
٥	العب يا ميمون	اشعار ١٩٩٣	فهيمى الخولى
٦	لعبة المنسر	اشعار ١٩٩٥	فيصل عزب

٧	دى مملكة	اعداد واشعار ١٩٩٦	فيصل عزب
٨	شايوك ياهو	تأليف واشعار ١٩٩٧	فهيمى الخولى
٩	استعماريكا	تأليف واشعار ١٩٩٨	محمد حسن
١٠	احلى الاحلام	اشعار ٢٠٠٠	محمد كريم
١١	عرس كليب	اشعار ٢٠٠٠	فهيمى الخولى
١٢	الناس اللى همه	تأليف واشعار ٢٠٠١	صفوت حجازى

● عروض استعراضية لفرق الفنون الشعبية (المسرح العمالى)

م	العمل	المشاركة	المخرج
١	جنون البشر	تأليف واشعار ١٩٩٦	هشام جمعة
٢	حزوقة	تأليف واشعار ١٩٩٨	صفوت حجازى
٣	بعزائىكا	تأليف واشعار ١٩٩٩	خالد حسنى
٤	فنون مصرية	تأليف واشعار ٢٠٠٠	احمد يونس
٥	القدس عربية	تأليف واشعار ٢٠٠١	صفوت حجازى

• كتابة سيناريو

من الأهم	فيلم رسوم متحركة اخراج ايمان الشلتاوى ١٩٩٢/ قطاع الانتاج
الحمامة المطوقة	فيلم رسوم متحركة اخراج ايمان الشلتاوى ٢٠٠٢/ قطاع الانتاج
كفاح وبناء	فيلم تسجيلي

• اعداد برامج

برنامج تأملات	غناء أحمد الشبوري وسهير طه حسين اخراج مديحة الغنيمي إذاعة صوت العرب ١٩٩٠
برنامج أمني وأغاني	اعداد مجموعة حلقات القناة الأولى التلفزيون ١٩٩٥

• كتابة الأغاني

مئات الأغاني للمطربين والمطربات المصريين والعرب

تحذير

يحذر استغلال كل أو بعض هذا الكتاب دون أخذ موافقة كتابية

من المؤلف محمد الصواف

للتواصل مع المؤلف : ٠١١١٠٩٢١٠٩٦ - ٠١٠٠ ٥٣٠٧٤٠٤

Mohammedsawaf22@yahoo.com

Mohammedsawaf2@gmail.com

